

DISPVATIO
DE COMMV-
NIONE SVB²³³
VTRAQVE
SPECIE.

PRO DEFENSIONE
*Catholicorum, contra Hussitas,
Lutheranos & Cal-
uinistas.*

AVTHORE
R.P. MARTINO BECANO
SOCIETATIS IESV SS. THEO-
logiæ Doctore & Professore
ordinario.

Permissu Superiorum.



Moguntiae, ex Officina IOANNIS ALBINI
Anno M. DC. IX.





REVERENDIS-
SIMO ET ILLVSTR.
PRINCIPI AC DOMINO D.
IOANNI SVICARDO, SACRÆ
Mogūtinæ Sedis Archiepiscopo, Sacri Ro-
mani Imperii per Germaniam Archi-
cancellario, Principi Electo-
ri, &c. Domino suo
Clementissi-
mo.

MARTINVS BECANVS.

DVopotissimum sunt
Reuerendissime &
Illustr. Princeps,
quæ hoc tempore, non minùs
populariter, quàm inuidiosè
obijciuntur Catholicis. Alte-
rum,

*rum, quod publica priuataq;
pacta, cum hereticis inita,
contra datam fidem, impunè
rescindi posse, verbo factoque
doceant. Alterum, quod Lai-
cos mutilato Eucharistiae Sa-
cramento contentos esse iu-
beant; Et contra apertam
Christi institutionem ac præ-
ceptum, sacrosanctum Cali-
cem ipsis suffurentur. Ut bre-
uissimè dicam, quod sentio,
duplex hæc calumnia est. Et
quidem priorem, qua de per-
fidia accusamur, in Disputa-
tione, De fide hæreticis ser-
uanda, satis perspicuè, ut opi-
nor, abstersi. Posteriores ve-
rò,*

*rò, quæ sacrilegij nos reos agit,
in hoc libello, De communione
sub vtrâque specie, abstergendam
putavi. Et sanè merito. Quis enim
ferat æquo animo, Catholicos Prin-
cipes in Imperio Romano, tan-
quam publicæ priuatæq; fidei
violatores, iniquissimè tra-
duci & accusari? Archiepi-
scopos & Prælatos Ecclesiæ,
de sacrilegij crimine quasi cõ-
uictos, in omnium ore circũ-
ferri? Vindicaui hanc iniu-
riam, ut potui. Confido, qua-
lemcunq; meum hunc cona-
tum ac laborem, qui pro Ca-
tholicorũ Principum & Ar-*

*chiepiscoporum iustissima de-
fensione susceptus est; tibi, ut-
pote Catholico Principi &
Archiepiscopo, non ingra-
tum fore. Ideoq³, sicut Dispu-
tatio, De fide hæreticis ser-
uanda, tuo sacratissimo no-
mini inscripta & dedicata
fuit; ita hanc, De communio-
ne sub utraq³ specie, eidem in-
scribendam & dedicandam,
esse, merito arbitratus sum.
Illustrissima Celsitudo vestra,
pro sua Clementissima in nos,
& uniuersam Societatem no-
stram propensione ac beneuo-
lencia, quæ publicè satis con-
testata est, æqui boniq³ consu-
lat,*

*lat, velim. Opto eandem C.V.
pro salute subditorū suorum,
quos felicissimè hæctenus gu-
bernavit, multos annos inco-
lumem à Deo conservari.*

*Moguntia ex Archie-
piscopali Collegio Societatis
JESV.*





DISPVATIO
DE COMMVNIONE SVB
vtraq; specie.

I.



Duersarii duplici nomine accusant hic Catholicos. Primo, quod contra apertam Christi institutionem & mandatum porrigant Laicis Eucharistiam sub vna tantum specie. Secundo, quod hac ratione sacrilegium, & furtum committant: sacrilegium, quia rem sacram aliter vsurpant, quàm oportet: furtum, quia priuant Laicos altera specie, quæ illis debetur; & consequenter, fructum alterius speciei suffurantur. Imo, quod grauius est, inquit, cùm Christus sub duplici specie, panis & vini, carnem & sanguinem suum, quasi testamento nobis legauerit; Catholici, qui testamē-

tiū uis executores esse volunt, alteram partem hæreditatis iniuste subtrahunt, & sola carne iubent Laicos esse contentos. An non merito queratur Laici? an non suo iure sanguinem dari sibi possint? Hæc illi.

Catholici, & facillimè se purgant ab his criminibus, & multo grauius de aduersariis queruntur. Purgatio illorum est hæc. Primò, negant extare ullum Christi præceptum de utraque specie Laicis porrigenda. Fatentur quidem, Christum præcepisse communionem; non tamen modum communionis sub vna vel utraque specie: sed potius reliquisse liberum, ut Laici, vel sub vna, vel sub utraque specie communicarent. Sicut præcepit Baptismū, non tamen modum Baptismi sub vna, vel trina immersione. Secundo negāt, ullum sacrilegium aut furtum interuenire. Nam si non extat præceptum de utraque specie; nullum sacrilegium est, vnam sine altera præbere, aut participare. Et rursum, si sub vna specie

II,

non minus continetur totus Christus, quam subvtraque; nec minor fructus percipitur ex vna, quam ex vtraque (quod postea probabimus) nullum furtum aut detrimentum est, vnā speciem exhibere sine altera. An iure queratur Legatarius, legatum, quod in duplici tabella descriptum est, in altera totum & integrum sibi exhiberi, sine vllō suo damno aut incommodo? Non opinor. Cur ergo querantur Laici, quando totus Christus, tota hæreditas, totum testamentum, in vna specie, integrè ipsis porrigitur? Nulla causa est. Non magis, quam si quis cum parocho expostulet, quod vna tantum, & non trina immersione, baptizatus ab eo sit.

III.

At inquiunt, si Christus vsum vtriusque, vel alterius speciei liberum reliquit, ut vos dicitis; quomodo audeatis Laicis prohibere vtranque speciem? Quod enim iure diuino liberum & licitum est; non potest iure humano prohiberi, & illicitum fieri.

Hunc

Hunc nodum facile dissoluam suo loco. Nunc tantum obiter quæro, an non Christus liberum reliquerit vsum vnus, vel trinæ mersionis in baptismo? Ita sanè. Et tamen olim in Concilio Toletano 4. cap. 5. prohibita fuit trina mersio, & concessa vna. Si hoc benè; cur alterum malè? Sed infra de hoc plura.

Iam, Catholicorum contra Aduersarios querelam sic explico. *IIII.*
In sacramento Eucharistiæ, iuxta Christi institutionem, & antiquorum Patrum consensum, hæc tria spectari possunt. Primò, symbola externa, seu species sacramentales; *Accipite panem & calicem.* Secundò, res sub iis contenta, nempe corpus & sanguis Christi; *Hoc est corpus meum: Illic est sanguis meus.* Tertiò, fructus, qui inde percipitur; *Qui manducat meam carnem & bibit meum sanguinem, habet vitam æternam.* Calvinistæ hæc omnia perdididerunt præter nuda symbo.

symbola panis & vini. His solis iubent Laicos esse contentos. Carnem & sanguinem Christi tanto interuallo dicunt abesse ab iis symbolis, quanto abest cælum à terra, Et, si caro & sanguis Christi ibi non est, quis fructus inde percipi potest? Lutherani fatentur quidē adesse Christum, sed mortuum. An non mortuum censent, qui obiiciunt, Catholicos solam carnem sine sanguine exhibere Laicis? qui putant, sub vna specie dimidium Christum; sub altera, reliquam eius partem contineri?

V. Vtriq; ergo merito arguendi: Calvinistæ, quia carnem & sanguinem Christi tollunt è Sacramento; & tota hæreditate dissipata, præter nudas tabellas, nihil relinquunt Laicis. Lutherani, quia non viuentem & integrum, sed mortuum & dissectū Christum Legatariis distribuunt; eiusque dimidiam partem sub specie panis; reliquam sub specie vini, seorsim summi à Laicis arbitrantur. Et tamen vtriq;


que, tam Lutherani, quam Calvinistæ,
posteaquã rem ipsam sacrilegè dissi-
parunt; de solis symbolis litem nobis
intendunt. Pêrinde sanè, ac illi, qui ab-
sumpto patrimonio, de nudis codi-
cillis altercantur.

Cæterum, quia mihi propositum *VI.*
non est, aduersariorum crimen & mi-
seriam persequi; sed Catholicorum
sententiã tueri & explicare; reuo-
cabo illam ad pauca capita, quæ hic
breuiter ob oculos proponam, vt v-
no quasi aspectu videri possint. Dein-
de, singula seorsim probabo. Spero
fore cum Dei gratia, vt Lector perspi-
cuè intelligat, Catholicos cum Chri-
sti, Apostolorum, & Ecclesiæ primi-
tiuæ sensu & doctrina, optimè
conspirare. Sunt autem
hæc capi-

ta.

CAPIT.

CAPITA DOCTRINÆ CATHOLICORVM



- I. Aliud est institutio diuina; aliud præceptum diuinum.
- II. Christus instituit Eucharistiam sub vtraq; specie; non tamen præcepit omnib. vsum vtriusq; speciei.
- III. Imo, vsum vnius speciei, tum verbo, tum facto, ipse approbavit.
- IIII. Quod etiam fecerunt Apostoli.
- V. Et post Apostolos alij vsq; ad nostra tempora.
- VI. Et rectè. Nam sub vna specie nõ minus continetur totus Christus, quam sub vtraq;.
- VII. Nec minor fructus percipitur ex vna, quam ex vtraq;, cæteris paribus.
- VIII. Et aliundè possunt esse legiti-
ma

ma causa, cur potius sub vna,
quam sub vtraq. Laici communi-
cent.

IX. Propter quas etiam statutū est
ab Ecclesia, vt sub vna deinceps
communicarent.

X. Nec aduersarij quicquam obje-
ciunt ex scripturis, quod dilui cō-
modè non possit.

XI. Sicut nec ex Patribus.

XII. Aut ex ratione fundata in scri-
pturis vel Patribus.

XIII. Omnino igitur persistendum
est in sententia Catholicorum.



CAPVT I.

Aliud est institutio diuina, aliud præceptum diuinum.

1. **V**Ideo non paucos, etiam bonos viros, hic errare. Putant idem esse, institutionem diuinam, & præceptum. Quare cum communio sub vtraq; specie à Christo instituta sit, quod negare non possumus; consequenter putant, etiam præceptam esse. At non ita res habet. Aliud est institutio, aliud præceptum. Multa à Deo instituta sunt, quæ tamen omnibus præcepta non sunt; vt matrimonium, ordo Ecclesiasticus, prædicatio Euangelii, officium baptizandi, & plura alia. Non enim tenentur omnes ex præcepto diuino inire matrimonium, suscipere ordines Ecclesiasticos, prædicare Euangelium, baptizare catechumenos. Vnde sicut hæc consequentia non valet; *Matrimonium à Deo institutum est: Ergo omnibus præceptum est:* ita similiter hæc non valet;

valet; *Communio sub vtraque specie à Christo instituta est: Ergo omnibus praecepta est.*

Dices; Hæc exempla benè ostendunt, non omnes teneri ad ea vsurpanda, quæ à Deo instituta sunt. Nihilominus, si quis sponte velit ea vsurpare, tenetur id facere secundum institutionem diuinam. Itaque videtur seruanda hæc regula; *Quamnis iure diuino non teneantur omnes inire matrimonium, suscipere sacros ordines, prædicare Euangelium, baptizare catechumenos; si quis tamen sponte velit aliquid istorum facere, tenetur facere eo modo, quo Deus instituit.* Verbi gratia, si quis velit alterum baptizare, tenetur aqua illum abluere, & pronunciare hæc verba; *Ego te baptizo in nomine Patris & Filij & Spiritus sancti.* Sic enim Christus instituit. Vnde, qui secus fecerit, non modo peccat, sed etiam nihil agit. Idem est in cæteris. Ergo similiter, si quis velit communicare, tenetur id facere sub vtraque specie, quia Christus sic instituit. Si aliter facit; &

II.

b pec-

peccat, & fructum sacramenti non percipit.

- III.* Respondeo. Si illa regula sumatur generatim absq; vlla limitatione; sine dubio falsa est, quod etiam aduersarii debent fateri. Hoc ostendo in exemplis allatis. Deus in institutione matrimonii, è costa viri dormientis formauit mulierem, & eam, in paradiso, illi coniunxit. An ideo necesse est, quotquot matrimonium ineunt, vt è suis costis fingant sibi sponsas & coniuges? Non opinor. Et Christus in institutione Eucharistiæ, vesperi post sumptam cænam, & lotis discipulorû pedibus, accepit panem & calicem, & facta consecratione, porrexit discubentibus. An ideo tenentur omnes vesperi post sumptam cænam, & lotis pedibus communicare? Ne aduersarii quidem id postulant. Itaq; regula superius allata, limitanda est, & distinctio adhibenda. Nam in iis, quæ à Deo instituta sunt, duo spectari possunt. 1. ipsorum substantia & essentia.
2. cir-

2. circumstantiæ seu accidentia. Si quis ergo velit vsurpare aliquod sacramentum à Deo institutum, tenetur adhibere omnia, quæ ad illius substantiam & essentiam pertinent; reliqua non item. Ad substantiam & essentiam baptismi pertinent hæc duo, ablutio externa, quæ fit per aquam; & forma verborum, *Ego te baptizo*. Sine his non perficitur baptismus. Cætera sunt extrinseca; vt quod ablutio fiat vna vel trina immersione; aqua fluminis, vel stagnante; ante vel post prandium; quod totum corpus mergatur, vel aliqua eius pars; quod forma verborum latino, vel alio sermone proferatur; & sic deinceps. Igitur si infantem perfundas aqua, & pronuncies verborum formam; baptismus legitimus est, & effectum sortitur, Nihil autem interest, semel an ter abluas; calidam aquam, an frigidam inspergas; in Iordane, an Rheno; ante, vel post meridiem id facias. Hæc enim iure diuino determinata non

b 2

sunt

sunt. Eodem modo res habet in Eucharistiæ sacramento. Si substantiam & essentiam illius spectes; non aliud requiritur, quam Christus sub externo symbolo panis aut vini consecrati. Si Christus non adsit (vt apud Calvinistas non adest) sacramentum nullum est. Si adsit quidem, non tamen sub symbolo panis aut vini; ne tunc quidem sacramentum est. Vtrūque ergo requiritur; & symbolum externum, & Christus illo symbolo significatus & comprehensus. Perinde est, vnum symbolum, an duo sint. Non minus sub vno, quam sub duobus Christus præsens est; & quidem totus: nec minus sub vno, quam sub duobus manducatur & bibitur

à fidelibus, vt deinceps
patebit,

CA-

CAPVT II.

*Christus instituit Eucharistiam sub
vtraq. specie; non tamen præcepit o-
mnibus vsum vtriusq.
speciei.*

DVo hic asserimus. Vnum est, I.
Christum sub vtraq. specie insti-
tuisse sacramentum Eucharistiæ. In
hoc omnes conueniunt. Et merito;
quia verba institutionis clara & aper-
ta sunt. Matth. 26. 26. Lucæ 22. 19.
Marci 14. 22. & 1. Cor. 11. 23. *Accipit
Iesus panem, & benedixit ac fregit, deditque
discipulis suis, & ait: Accipite & comedite,
Hoc est Corpus meum. Et accipiens calicem,
gratias egit, & dedit illis dicens, Bibite ex
hoc omnes; Hic enim est sanguis meus noui
testamenti.*

Alterum est, Christum non præce- II.
pisse omnibus vsum vtriusq. speciei.
Hic dissentiunt à nobis aduersarii. Vr-
gent illi præceptum. Nos dicimus,
b 3 nul-

nullum extare. Hoc dupliciter probamus. Primò, quia aduersarii in tota Scriptura nullum possunt inuenire. Secundò, quia nos è contrario sufficienter conuincimus, vnā speciem licitè vsurpari posse.

III. Prius argumentum sic vrgeo. Si in scripturis extaret aliquod præceptum de vtraq; specie, vel id colligitur ex sola institutione huius sacramenti, vel aliundè. Neutrum dici potest. Non prius, quia, vt ex dictis patet, multa sunt à Deo instituta, quæ tamen præcepta non sunt. Ergo ex sola institutione non potest colligi præceptum. Nec posterius, quia testimonia Scripturæ, in quibus aduersarii putant contineri præceptum, reuera non continent præceptum, vt suo loco latius; nunc breuiter sic ostendo. Aduersarios in hac re habemus triplices, Hussitas, Lutheranos & Caluiniſtas. Oēs quidem quærunt præceptum, sed nulli inueniunt. Hussitæ quærunt in illis verbis, Ioann. 6. 53. *Nisi manducaueritis*

carnem

carnem filij hominis, & biberitis eius sanguinem, non habebitis vitam in vobis. At reclamant Lutherani. Negant toto illo capite vel vnum esse apicem, qui de sacramento Eucharistiæ intelligatur. Ipsi ergo quærunt in illis, Lucæ 22. 19. *Hoc facite.* Sed repugnat Calui-
 nus. Solis Ecclesiæ ministris, non Lai-
 cis, id dictum esse à Christo conten-
 dit. Caluinus quærit in istis, Matth. 26.
 27. *Bibite ex hoc omnes.* Sed ad solos
 Apostolos ea pertinere, declarat Mar-
 cus, cum ait; *Et biberunt ex illo omnes.*
 Hinc concludo, aduersarios non cõ-
 uenire inter se de præcepto. Imo,
 quod amplius est, ita discrepare, vt vbi
 alii putant se inuenisse præceptum, alii
 negent ibi esse. Vide plura capi-
 te 10.

Posterius sic vrgeo. A tẽpore Chri-
 sti & Apostolorum, vsq; ad annũ 1412.
 semper liberum fuit in Ecclesia, vel
 sub vna, vel sub vtrâque specie com-
 municare; nec vnquã docuerunt Pa-
 tres, vtranque speciem diuino iure

necessariam esse. Primi, qui hoc dixerunt, fuerunt duo Germani, Petrus Dresdensis, & Iacobellus Misnienſis, qui Pragæ in Bohemia hanc de communione sub vtraq; specie controuerſiam excitarunt, Ergo ſignum euidentis eſt, vtranq; ſpeciem diuino iure præceptam non eſſe. Hoc argumentum ſicut & alterum, proſequar in ſequentibus capitulis. Hic obiter attigſſe, ſatis eſt.

CAPVT. III.

Chriſtus uſum vnius ſpeciei, & verbis, & facto comprobauit.



- I. **Q**uod verbis comprobarit, patet ex capite 6. Ioannis, vbi agens de fructu Eucharistiæ, non ſemel, ſed ſæpius aſſeruit, vnam ſpeciem prodeſſe ad ſalutem. Si quis, inquit, manducauerit ex hoc pane, viuet in æternum. Et panis, quæ ego dabo, caro mea eſt pro mundi vita. Et iterum;

rum; *Non sicut manducauerunt Patres vestri manna, & mortui sunt, Qui manducat hunc panem, viuet in aeternum.* Ex his, & similibus verbis concludo, manducationem carnis Christi sub vna specie, prodesse ad salutem. At non prodesset, si vtraq. species esset necessaria.

Dices, aduersarii negant in illo capite agi de Eucharistia, seu manducatione sacramentali. Respondeo. Aduersarii sunt triplices, vt dixi, Hussitæ, Lutherani & Caluinistæ. Horum alii negant, vt Lutherani & nonnulli Caluinistæ: alii concedunt, vt Hussitæ, & Caluinistæ Gallicani, cum Plessæo l. 4. de Eucharistia c. 2. p. 661. Illi ergo se mutuo destruunt, & nos confirmant. Et ab illis sumo tale argumentum; vel agitur in illo capite de Eucharistia, vel non agitur. Si agitur; errant Lutherani & pleriq. Caluinistæ, qui id negant. Si non agitur; errant Hussitæ & Caluinistæ Gallicani, qui id concedunt. Rursum, si agitur, quod nos cum tota

II.

salua est: Euicimus vnā speciem prodesse ad salutem. *Si quis*, inquit Christus, *manducauerit ex hoc pane, uiuet in æternum*. Si non agitur; omnes aduersarii temerarii sunt. Hussitæ quidē, quia nouum dogma Eucharisticum astruere conati sunt ex eo scripturæ loco, ubi non agitur de Eucharistia. Lutherani verò & Calvinistæ, quia hoc Hussitarum dogma amplexi sunt.

III. Iam, quod factō vnā speciem Christus approbarit, patet ex Luca c. 24. 30. ubi duob. discipulis in Emaus sub sola specie panis Eucharistiā porrexit. Sic enim scribit Lucas; *Et factum est, dum recumberet cum eis, accepit panem, & benedixit ac fregit, & porrigebat illis. Et aperti sunt oculi eorum, & cognouerunt eum, & ipse euannit ex oculis eorum*. Porro, hunc locum intelligi de pane Eucharistico, fatetur Philippus Melanchton in Apologia Confessionis Augustanæ, & plures alii ex aduersariis. Et tribus modis probari potest. Primo, auctoritate Patrum. Sic enim explicant D. Hiero-

Hieronimus in Epitaphio Paulæ ad Eustochium, Augustinus l. 3. de consensu Evangelistarum c. 25. & sermone 146. de tempore, & Epistola 59. ad Paulinum q. 8. Author imperfecti operis, hom. 17. in Matthæum, in fine, Theophylactus in c. 24. Lucæ, & non pauci alii. Et quidem D. Hieronymus loco citato dicit, Christum, consecrando panem Eucharisticum, Cleophæ domum in Ecclesiam dedicasse. Verba eius sunt hæc; *Repetitioq; itinere venit Nicopolim (nempe Paula Eustochii mater) quæ prius Emaus vocabatur, apud quam in fractione panis cognitus Dominus, Cleophæ domum in Ecclesiam dedicauit.*

Secundo probatur ex ipso contextu. Ac singula penè verba ponderanda sunt. *Et factum est*, inquit. Ita loqui solet Scriptura, quando grande aliquod mysterium enarrandum est. Sequitur autem mysterium. *Accipit panem, & benedixit ac fregit, & porrigebat illis.* Iisdem planè verbis

IIII.

verbis usus est Euangelista in vltima cæna describenda, Matth. 26. 26. *Accipit panem & benedixit ac fregit, deditque discipulis suis.* Si ergo hæc verba intelliguntur de pane Eucharistico, vt oēs fatentur; cur non similiter illa? Nihil enim inter se differunt. Vnde infero, Christum bis instituisse Eucharistiam: semel Hierosolymis in vltima cæna ante passionem; & semel in Emaus post resurrectionem: illic sub vtraque specie; hic sub vna: illic adfuisse Apostolos, qui tunc fiebant sacerdotes; hic duos discipulos, qui adhuc erant Laici.

V. Tertiò probatur ex effectu. *Aperti,* inquit, *sunt oculi eorum, & cognouerunt eum.* Vnde autem aperti sunt? Ex sumptione panis Eucharistici. Sic Augustinus l. 3. de consensu Euangelistarum c. 25. cum ait; *Vt cum eis benedictum panem porrigeret, aperirentur oculi eorum, & agnoscerent eum.* Et infra; *Non autem incongruenter accipimus hoc impedimentum in oculis eorum à Satana factum fuisse,*

se, ne agnosceretur Iesus. Sed tamen à Christo est facta permissio vsq. ad sacramentum panis, vt vnitate coporis eius participata, remoueri intelligatur impedimentum inimici, vt Christus possit agnosci. Et clarissimè Theophylactus loco citato; Insinuat & aliud quiddam, nempe quod oculi eorum, qui benedictum panem assunt, aperiantur, vt agnoscant illum. Magnam enim & indicibilem vim habet caro Domini.

His tribus argumentis, nihil habent aduersarii, quod solidè respondeant. Conantur tamen effugere, vt possunt; & singulis aliquid opponunt. Ac primum dicunt, tametsi aliqui Patres illum locum intelligāt de pane Eucharistico; alios tamen esse, qui aliter sentiant. Nihil ergo certi ex Patribus haberi posse. Ego contra sic vrgeo. Si D. Hieronymus, Augustinus, & alii Patres citati, qui diuersis sæculis vixerūt, putarunt Christum sub vna specie dedisse Eucharistiā discipulis in Emaus; consequenter putarunt, communionem sub vna specie non esse prohibi-

tam

VI.

tam iure diuino : Ergo, siue Christus dederit Eucharistiam sub vna specie, siue non dederit; tamen Patrum antiquorum sententia est, vnā speciem licitè vsurpari posse. An hoc satis non est? Nihil enim aliud hic quærimus. Et sanè dicant aduersarii, an putent Augustinum, Hieronymum, & similes Patres in hac re errasse, nec ne? Si putant errasse; quomodo hoc probant? Sin minus; neq; nos erramus, qui illos sequimur.

¶ II. Alterum effugium est; ex illis verbis, *Accepit panem, benedixit, fregit, porrexit*, non posse quicquam conuinci. Nam similia verba reperiuntur Marci 6. 41. *Acceptis quinque panibus, & duobus piscibus, intuens in cælum, benedixit & fregit panes, & dedit discipulis suis, vt ponerent ante eos.* At hæc verba non intelliguntur de pane Eucharistico, sed de panibus per miraculum multiplicatis : Ergo nec priora necesse est intelligi de pane Eucharistico. Facilis est responsio, Christus in Euangelio ter legi-

legitur benedixisse panem. 1. in multiplicatione panum & piscium, 2. in ultima cæna. 3. in Emaus. Et semper aliquid mysterii seu miraculi operatus est. Vnde euidenter concludimus, benedictionem Christi circa panem, fuisse semper efficacem, & aliquius mysterii seu miraculi effectricem. Solum potest esse quæstio de qualitate mysterii, an scilicet in illa triplici benedictione, quæ diuerso loco ac tempore à Christo facta est, semper fuerit idem mysterium seu miraculum, an potius diuersum. Hoc autem non aliunde melius, quam ex circumstantiis, & Patrum interpretatione discerni potest. Et quidem in prima benedictione, satis constat ex ipso contextu, fuisse miraculum multiplicationis panum. Nam quinque panes ita multiplicati sunt, vt ex iis non modo satiata fuerint quinque milia virorum, sed etiam collecti duodecim cophini fragmentorum, quæ

quæ supererant. In altera, quæ facta est in vltima cæna, panis & vinum, in carnem & sanguinem Christi conuersa sunt, vt patet ex illis verbis; *Hoc est corpus meum: Hic est sanguis meus.* Et sic Patres omnes interpretantur. In tertia, quæ in Emaus contigit, de vno constat, de altero disputamus. Constat oculos discipulorû apertos fuisse. Hoc enim Scriptura expressè dicit. Disputamus, an hoctribuendum sit pani Eucharistico? Affirmant Augustinus & Theophylactus. Et quæ causa est, cur negemus? Aduersarii nullam adferunt. Nam illi, qui putant ideo dici, apertos fuisse discipulorum oculos, quod Christum agnouerint ex peculiari modo frangendi panem; non causam, sed fabulam adferre mihi videntur. Vnde enim habent, Christum solitum esse tam artificiosè panem frangere manibus, ac si cultro diuisus esset? Euangelistæ nihil huius meminerunt. Mera coniectura est. Et sanè, si quid tale præter morem aliorum fecisset


cisset Christus; Pharisei minimè dissimulassent. Solent enim, etià in reb. minimis illum reprehendere, si quid novum, aut alienum ab eorum consuetudine vsurparet. Non ergo discipuli agnouerunt Christum ex artificiosa panis fractione; quæ nullum in Scriptura fundamentum habet; sed ex sumptione panis Eucharistici; cuius ea vis fuit, vt eorum oculi, non solum corporis, sed etiam mentis, repente fuerint illuminati.

Atq; hæc dicta sunt contra eos, qui *VIII.*
negant loco citato agi de Eucharistia. Sunt alii, qui quidem id concedunt (quia vident non nisi temerè negari posse) negant tamen inde colligivsum vnus speciei; quia volunt in fractione panis per synechdochen intelligi totum Sacramentum sub vtraq; specie. Sed hoc neq; probare possunt ex Scriptura; nec ab vlllo probato auctore asseritur; nec omninò verisimile est. Nam Lucas scribit, Christum porrecto pane benedicto, euanuisse ex
c oculis

oculis eorum. Ergo post porrectum panem non consecrauit calicem.

IX.

Vnum obiici potest; quia si nō admittimus hic synechdochen; ergo sicut ex illo loco colligimus vsum vnus speciei, sic etiam colligere poterimus consecrationem vnus speciei. At Catholici negant, vnam speciem sine altera consecrari posse: Ergo etiā negare debent, Christum sub vna specie Eucharistiam porrexisse. Respondeo. Si spectemus naturam rei, fateor vnam speciem sine altera consecrari posse, & hoc à Christo factum esse. Si spectemus ius Ecclesiasticum, vna species sine altera consecrari non debet; & hoc volunt Catholici. De hac re iterum dicemus sequenti capite.



CAPVT IIII.

*Tempore Apostolorum vsurpatá fuit
vna species.*

HOc colligitur ex duplici Scriptu-
ræ loco. Prior habetur Act. 2. 42.
vbi Lucas sic scribit; *Erant autem perse-
uerantes in doctrina Apostolorum, & com-
municatione fractionis panis, & orationibus.*
Hic agi de Eucharistia, fatentur aduer-
sarii, Lutherus in serm. de Eucharistia,
Kemnitius in 2. p. Examinis, Calui-
nus lib. 4. inst. cap. 17. §. 35. & plu-
res alii. Et probatur variis modis. Pri-
mo, quia fractio panis coniungitur
cum doctrina & oratione, tanquam
res sacra cum rebus sacris. Non ergo
sermo est de communi & domestico
pane, sed de Eucharistico. Secundo,
quia Syrus interpres sic vertit; *Et com-
municabant in precibus & fractione Eu-
charistia*; vt etiam fatetur Beza
c 2 in

Beza in illum locum, & Plessæus lib. 1. de Eucharistia cap. 1. pag. 37. Tertio, quia Lucas agit de nouis Christianis, qui tùm primum erant conuersi & baptizati. Sic enim loquitur; *Qui ergo receperunt sermonem eius* (nempe Petri concionantis) *baptizati sunt.* Et statim subdit; *Erant autem perseverantes in doctrina Apostolorum, & communicatione fractionis panis.* Porro constat, Neophytos in primitiua Ecclesia, statim post baptismum solitos esse Eucharistiam percipere. Quarto, quia non fuisset magna laus, primos illos Christianos perseverasse in cibo corporali. Imò, nec opus fuisset Lucam id commemorare, quia satis constat, homines quotidie vesci solere pane domestico. At rarum, & commemoratione ac laude dignum est, perseverare in oratione, & Eucharistiæ perceptione.

- II. Posterior locus habetur Act. 20. 7. *Vna autem sabbati, cum conuenissemus ad frangendum panem, Paulus disputabat cum eis profecturus in crastinum, protraxitq; sermonem*

monem vsq. ad mediam noctem. Hic etiam agi de Eucharistia, fatentur Calvinus & Beza in illum locum, Kemnitius in 2. pag. Examinis, & plures alii. Et patet ex ipso contextu. Primo, quia diligenter notatur dies ille, quo in primitiua Ecclesia solebant fideles conuenire ad sacros conuentus, qui erat prima sabbati, id est, dies Dominicus, vt docent Iustinus apol. 2. & Augustinus epist. 86. ad Casulanum. Secundo, quia Paulus dicitur mansisse Troade septem diebus, & expectasse primam sabbati, vt tunc fideles conuenerent ad frangendum panem in magno cœnaculo, lampadibus copiosissime illustrato; idque nocturno tempore, propter metum persecutionis. At certè, si fuisset prophanum conuiuium, quorsum adhibitæ essent tot ceremoniæ?

Nunc ex vtroq. loco sic argumentor. Lucas vtroq. loco agit de pane Eucharistico, vt aduersarii fatentur; & nullam facit mentionem calicis: Ergo

omnino credibile est, primos illos Christianos, qui ex Iudæis conuersi erant, sub vna specie communicasse. Dices forte, Lucam in fractione panis totū sacramentum per synechdochen intellexisse. Sed ex triplici capite refelli id potest. Primo, quia sine fundamento asseritur. Et, si sola coniectura sufficit; cur non similiter dicamus, Christum in deserto, non solum panes, sed etiam aliquot cados vini multiplicasse? Tamen hoc, quam illud dici potest. At neutrum probatur. Secundo, quia Lucas diuersis locis, ter minimū, si non sæpius, agit de usu Eucharistiæ; & nunquam meminit, nisi vnius speciei. Quis autem credat, præsertim in re tanti momenti, nunquā illū propriè, sed semper synechdochicè loqui voluisse? Tertiò, quia Iudæi, qui recens conuersi erant, adhuc in multis rebus seruabant legem Mosaicam, iuxta illud Actor. 21. 20. *Vides frater, quot millia sunt in Iudæis, qui crediderunt, & omnes amulatores sunt legis?*

At

At secundum legem Mosaicam sole-
bant in sacrificiis abstinere à sanguine
& vino. Ergo planè verisimile est, eos
etiam in Eucharistiæ perceptione à
calice abstinuisse. Et sanè de quibus-
dam id negari non potest. Multi e-
nim ex iis erant Nazarei, qui non bi-
bebant vinum, nec radebant caput,
vsque ad finem dierum voti sui, vt pa-
tet Act. 18. 18. & Act. 21. 23. De his
quæro, an durante voto, sumpserint
Eucharistiam, nec ne? Sumpsisse con-
stat, quia Lucas de omnibus dicit; *E-
rant autem perseverantes in doctrina Aposto-
lorum, & communicatione fractionis panis,*
At durante voto non sumpserunt ca-
licem: Ergo in sola fractione panis
communicarunt. Hinc iam patet di-
scrimen inter Lucam & Paulum. Lu-
cas in Actibus semper loquitur de
vna specie; Paulus in priori Corin-
thiaca, de vtraque. Quare hoc? quia
Iudæi, de quib. agit Lucas, solent in suis
sacrificiis abstinere à vino & sangui-

ne. Corinthii contra, solent uti calice
dæmoniorum. Vtriq; ergo, cum pri-
mum conuersi sunt ad Christum, ne
statim cogerentur contra suam con-
suetudinem facere, poterant suo arbi-
tratu, hi sub ytraq; illi sub vna specie
communicare.

IIII.

Dices; Si ita est, ergo Apostoli cō-
secrarunt Eucharistiam sub vna spe-
cie: quod Catholici negant fieri posse.
Respondeo. Quid mirum, Apostolos
hoc fecisse, cum ante illos hoc fecerit
Christus in Emaus, ut paulò ante o-
stensum est? An non liceat discipu-
lis imitari magistrum suum? Nec soli
Apostoli, sed etiam alii post tempora
Apostolorum id fecerunt. Refert Vo-
laterranus lib. 7. geographiæ, Inno-
centium 8. permisisse Noruegis, ut si-
ne vino, sacrificium celebrarent. Et
pleriq; Catholici docent, non malè
id permissum esse. Tametsi enim iure
Ecclesiastico prohibitum sit, vnam
speciem consecrare sine alia: tamen
neq; ex natura rei malum est: & in iu-

re

re Ecclesiastico potest fieri dispensatio. De hac re videri possunt Genebrardus in chronico, Claudius repet. 10. de Eucharistia, cap. 3. Tapperus art. 13. Ioānes Hesselius de cōmunionē sub vtraq; specie, Henriquez lib. 8, theologiæ moralis cap. 13. num. 1. Belarminus lib. 4. de Pontifice cap. 14. in fine, Gabriel in canone Missæ lect. 13. dub. 3. Antoninus 3. p. tit. 13. cap. 6. §. 1. Angelus v. Eucharistia, num. 20, & plures alii.

CAPVT. V.

*Post tempora Apostolorum fuit vna
species in vsu.*

HOc duplici ordine ostendi potest. Primò, incipiendo à primitiua Ecclesia, & progrediendo vsque ad nostra tempora. Secundò, incipiendo à nostris temporibus, & progrediendo ad primitiuam Ecclesiam.

Hunc posteriorem ordinem serua-
bo, ad redarguendum Plessæi men-
dacium. Is enim libr. 1. de Eucha-
ristia cap. 10. pag. 126. dicit, com-
munionem sub vna specie tam no-
uam esse, vt hominis ætatem vix ex-
cedat. At sanè multo antiquior est.
Viguit enim tempore D. Thomæ
Aquinatis, qui ante trecentos an-
nos de ea sic scribit; *Est multarum
Ecclesiarum vsus, vt populo communi-
canti detur corpus Christi sumendum,
non autem sanguis. Et iterum; Quia
creuit multitudo populi Christiani, in qua
continentur senes, & iuuenes, & paruuli,
quorum quidam non sunt tantæ discretio-
nis, vt cautelam debitam circa vsus hu-
ius sacramenti adhibeant; ideò providè
in quibusdam Ecclesiis seruatur, vt popu-
lo sanguis sumendus non detur, sed solùm
à sacerdote sumatur. Et rursum; Nihil
derogat perfectioni huius sacramenti, si po-
pulus sumat corpus sine sanguine. Et de-
nique;*

niq̃ue ; *Potest à populo sumi corpus sine sanguine. Nec exinde sequitur aliquod detrimentum, quia sub vtraque specie totus Christus continetur. Hac ante trecentos annos scripta sunt.*

Plus dicam. Ante annos mille & II.
 amplius, publicè in Ecclesia, tam orientali, quàm occidentali, ṽsitata fuit communio sub vna specie. Hoc variis argumentis convinci potest. Primum est, quia Manichæi communicabant olim inter Catholicos (occultata hæresi) sub vna specie, vt testatur Leo Papa sermone quarto, de Quadragesima : Et tamen nunquam ab Ecclesia propter hanc causam reprehensi aut damnati sunt : Ergo communio sub vna specie non putabatur olim illicita. Hoc ita confirmo. Augustinus, Epiphanius, & alii plures, accuratè scripserunt de erroribus Manichæorum. At nemo illorum scripsit

scripsit vos errasse, quod sub vna specie communicarent: ergo communicare sub vna specie, non censebatur tunc erroneum. Hoc argumentum magni ponderis apud omnes esse debet. Quis enim credat vigilantissimos Ecclesiæ pastores, qui in notandis & confutandis hæreticorum dogmatibus fuerunt diligentissimi, non notaturos fuisse hoc dogma de vna specie, si putassent esse hæreticum? At nemo, vt hæreticum, notauit,

III. Imo, inquires, duo Pontifices notant, Leo & Gelasius. Vterq; enim dānauit Manichæos, quod abstinere à calice. Et quidem Leo Papa serm. 4. de Quadragesima sic habet; *Ore indigno Christi corpus accipiunt (Manichæi) sanguinem autem redemptionis nostræ haurire omnino declinant.* Gelasius verò apud Gratianum cap. comperimus. de Consecratione, dist. 2. *Comperimus, inquit, quod quidam sumpta tantummodo corporis sacri portione, à calice sacri cruoris abstineant. Qui procul dubio, quoniam nescio*
qua

qua superstitione docentur astringi, aut integra sacramenta percipiant, aut ab integris ar-
teantur; quia diuisio vnius eiusdemq, my-
sterij sine grandi sacrilegio non potest proue-
nire.

Verum hæc obiectio, quam Lutherani & Calvinistæ, contra nos vrgent, planè confirmat nostrâ sententiâ. Ac primum, quod attinet ad Leonem Papam, res sic habet. Erant tunc temporis Romæ multi Manichæi ex Africa profugî, qui vt suam hæresim occulta-
rent, & se Catholicos esse mentirentur (alioqui admissi & tolerati non fuisset) publicè cum Catholicis templis adibant, & cum eis communicabant. At priuatim in clandestinis conuenticulis suam hæresim exercebant. Vt igitur ciues Romani, qui verè Catholici erant, possent sibi cauere ab huiusmodi hominum genere; Pontifex publicè pro concione monuit, eos pro Manichæis habendos esse; qui in cõmunione semper à calice abstinerent. Hanc enim sufficientem esse notam, qua

IIII.

Baronius
tomo 6.
annaliũ,
circa an-
nũ 444.

Leo ser.
4. de qua
dragesi-
ma.

qua ab aliis discerni queant. Alios enim non semper, sed aliquando; Manichæos semper abstinere à calice. Verba Leonis sunt hæc; *Cumque ad tegendam infidelitatem suam nostris audeant interesse mysteriis, ita in sacramentorum communione se temperant, ut interdum tutius lateant: ore indigno Christi corpus accipiunt; sanguinem autem redemptionis nostræ haurire omnino declinant. Quod ideo vestram volumus scire sanctitatem, ut nobis huiusmodi homines & his manifestentur inditiis, & quorum deprehensa fuerit sacrilega simulatio, notati & proditi, à sanctorum societate, sacerdotali authoritate pellantur.*

V.

Hinc sumo efficax argumentum pro nobis: Et quidem triplex. Vnum est; Manichæi, qui Romæ volebant esse occulti, non fuissent ausi publicè abstinere à calice, si omnes Catholici coacti fuissent sumere calicem. Sic enim statim fuissent agniti. Ergo cuiusdens signum est, usum calicis fuisse liberum apud Catholicos. Alterum; Leo Papa, non monuit Romanos, ut
nota-

notarent eos qui abstinere à calice;
sed eos, qui semper abstinere. Hoc
enim significat per illam particulam,
Omnino, cum ait; *sanguinem redemptionis*
nostræ haurire omnino declinant. Ergo hoc
fuit discrimen inter veros Catholicos,
& occultos Manichæos, quod hi sem-
per, illi aliquādo sub vna specie com-
municarent. Vna igitur species fuit
tunc licita. Tertiū; Dicant Lutherani &
Caluinistę, an cōmunio sub vna specie
fuerit Romę tunc temporis noua, &
primū introducta à Manicheis; an
etiam prius vsitata à Catholicis? Si
noua, facillimè poterat notari à Ro-
manis; nec opus erat Pontificis mo-
nitione. Si prius vsitata, nihil nos faci-
mus hoc tempore, quod olim à Ca-
tholicis factum non sit.

Accedit, quod idē Leo in aliis cō-
cionib. populo explicarit, quinā esset
errores Manichæorū; vt patet ex serm.
4. de collectis, & serm. 5. de ieiunio de-
cimi mēsis. Romani enim nesciebant,
in qb. pūctis Manichæi dissiderēt à Ca-
tholicis. I-

VI.

Igitur à Leone Papa instructi sunt. At Leo nunquam dixit eos errare in usu vnius speciei; quod tamen sine dubio fecisset; si vna species diuino iure esset interdicta; præsertim, cum tam serio ac paterne hortaretur suos ciues, ut ab omni Manichæorum errore essent alieni. Quomodo autem poterat esse alieni, nisi speciatim de vnoquoque monerentur?

VII. Veniamus ad Gelasium Papam, qui successit Leoni in Pontificatu post annos triginta duos. Ille igitur, quia videbat Catholicos aliquando abstinere à calice, sicut fecerant tempore Leonis, & aliorum, qui Leonem proximè secuti sunt; ideoque non satis facile discerni posse à Manichæis; tulit nouam legem, ut deinceps Catholici nunquam abstinerent à calice. Sic enim putabat fore, ut statim, quotquot abstinerent à calice, noscerentur Manichæi esse, non Catholici. Nec tamen hoc ideo fecit, quod existimaret vnâ speciem licitè sumi non posse; sed ne
Catho-

Catholici, si pergerent abstinere à calice cum Manichæis, paulatim imbuerentur errore Manichæorum. Hi enim duplici de causa abstinebant à calice. Primo, quod putarent vinum esse fel Draconis. Secundo, quod negarent Christum esse verè mortuum, & verum sanguinem effudisse. In utroque errabant. Ne ergo Catholici viderentur ob easdem causas abstinere, iussit Pontifex, ne deinceps abstinere, ad præcauendam vtriusque erroris suspensionem. Itaque illa verba Gelasii, *Divisio vnius eiusdemque mysterij sine grandi sacrilegio non potest provenire*; non significant, vnam speciem non posse sumi sine sacrilegio, vt falso interpretantur Lutherani & Calvinistæ; sed opinionem illam, qua Manichæi putabant abstinendum esse à calice, non posse provenire, sine suspitione nefandæ hæresis. Vide Baronium tomo 6. Annalium, anno Christi 496. vbi doctè & prolixè de hac re disputat contra Nouatores.

VIII. Porro, quod Manichæi fuerint in illo duplici errore, de quo dixi, patet ex Augustino, libro de hæresibus, cap. 46. ubi sic ait; *Nam & vinum non bibunt, dicentes se esse Principium tenebrarum: Et ibidem; Affirmant Christum non fuisse in carne vera, sed simulatam speciem carnis humanis sensibus præbuisse, ut mortem & resurrectionem memiretur.* Similia de iis scribit Leo Papa serm. 4. de collectis, in fine, & serm. 4. de natiuitate Domini, circa medium, & serm. 4. de epiphania, paulo post medium. Eodem spectat illud Gelasii; *Qui procul dubio, quoniam nescio qua superstitione docentur astringi, &c.* Hinc iterum concludo pro nobis; Gelasius, Augustinus & Leo damnarunt quidem errores, seu superstitiones, propter quas Manichæi abstinebant à calice; non tamen damnarunt ipsam abstinentioniam à calice: Ergo putarunt communionem sub vna specie non esse illicitam.

Hæc-

Haftenus primum argumentum, quod ex factō Manichæorum desumptum est. Alterum sumi potest ex vsu Ecclesiæ orientalis, præsertim Constantinopolitanæ. Nam sicut Romæ tempore Leonis Papæ, liberum fuit sub vna, vel vtraq; specie communicare; sic etiam Constantinopoli tempore D. Chrysostomi. Hoc euidenter conuincit historia, quam referunt Sozomenus l. 8. cap. 5. Nicephorus l. 13. cap. 7. Baronius tomo 5. annalium, anno Christi 400. in fine, & alii complures. Est autem hæc; *Vir quidam (inquit Nicephorus) Macedonij morbo laborans, uxorem eadem contagione infectam habebat. Hic cum aliquando in magnum illum virum (nempè D. Chrysostomū) incidisset, quomodo de Deo sentiendum sit, differentem, statim priori opinione relictā mutatus, dicta illius laudauit, coniugemque vt itidem & ipsa sententiam suam mutaret, cogere institit. Vbi verò illa ex consuetudine & colloquiis quotidianis familiarium muliercularum pendens, admonitionem eius*

non suscepit, & marius re sapius tentata, nihil effecit; postremo ei denunciauit, nisi communem atq; eandem secum de Deo teneret opinionem, minime se eam secum habitare passurum esse. Mulier postquam id per simulationem annuit, ex ancillis, quam fidam sibi esse credebat, vni, quid facturam esset, credidit, ut per fraudem virum falleret. Et sacrorum mysteriorum tempore, accedens illa, donum, sicuti mos erat, (qui sacris instituti sunt, quid dicam, intelligunt) accepit; atq; id retinens, perinde atq; orationi vacatara, se inclinata submisit, mysteriumque sacrosanctum occultit: Et quae ei assisabat ancilla, pro eo panem communem domo allatum obtulit, quem illa ori admonens, in lapidis naturam induratum esse, dum dentibus atterere conatur, sensit. Itaque timore percita, ne quid grauius per Dei vindictam pareretur, propter miraculum, quod praeter opinionem acciderat, nulla interposita mora, ad magnum illum accedit Patrem, rem actam ei exponit, & lapidem ostendit certo & aperte morsus indictum exhibentem, qui iam materiam priorem ignoraret, nouumq; & alienum colorem obtineret. Et venia

nia delicti petita, deinceps in eadem cum marito opinione perduravit. Lapis iste ad fidem miraculi eius faciendam, longo tempore inter Ecclesiæ donaria asseruatus, spectatoribus miraculo fuit. Hæc Nicephorus.

Ex hac historia tria colligimus, quæ ad rem faciunt. Primo, quod tunc temporis Eucharistia sub specie panis data fuerit communicantibus in manu, ut eam postea sumerent, quisque pro sua deuotione. Secundo, quod illa femina hæretica, ut in gratiam mariti simularet se Catholicam esse, publicè in manu acceperit panem Eucharisticum à Sacerdote, tanquam paulo post eum comestura. Tertio, quod digressa à Sacerdote, clam absconderit panem Eucharisticum, & pro eo communem ac prophanum ori admouerit, ut saltem cõmunicasse videri posset. Hinc concludo, tunc temporis liberum fuisse, vel sub vna, vel sub vtraque specie communicare. Nam si omnes coacti fuissent sumere de calice, non potuisset illa mulier dissimulare

X.

suam fraudem, quia calix non dabatur communicantibus in manu, sed à Diacono eorum ori admouebatur, vt habet Cyrillus catechesi 5, mystagogica.

XI.

Nihil habent hic aduersarii, quod solidè respondeant. Plessæus l. 1. de Eucharistia cap. 12. pag. 163. sola interrogatione conatur eludere. *In illa, inquit, narratione de muliere infideli, qua Chrysostomum decipere conata, licet Sozomenus panis tantum meminerit in lapidem conuersi; an non de publica Ecclesia Constantinopolitana communione agitur, in qua vtrâque speciem administratam, quis vnquam dubitauit?* At mi Plessæe, non est quaestio, an vtrâque species publicè fuerit administrata; sed potius, an liberum fuerit communicantibus, vel vnâ, vel vtranque speciem accipere. Hoc autem liberum fuisse, optimè conuincitur ex historia citata. Nec quisquam, salua historiæ veritate, inficiari id potest.

XII.

Tertium argumentum sumitur ex
 communione domestica, quæ olim
 apud Catholicos sub altera specie fuit
 vsitata: Solent enim fideles Eucharis-
 tiam domum deferre, & ibi pro sua
 oportunitate sumere, vt tradunt Ter-
 tullianus, Basilus, Clemens Alexan-
 drinus, Cyprianus, Hieronymus, Au-
 gustinus, & alii antiqui Patres. Et qui-
 dem Tertullianus l. 2. ad uxorem (vbi
 hortatur eam, ne cum Christiana sit,
 nubat gentili marito, eo quod non
 possit exercere officia Christianæ reli-
 gionis, quin maritus gentilis aduertat)
 inter cætera sic ait; *Latebisne tu, cum le-
 ctulum, cum corpusculum tuum signas? Non
 sciet maritus, quid secreto ante omnem cibum
 gustes? Et si scierit, panem, non illum
 credit esse qui dicitur.* Hinc apparet, fide-
 les solitos esse domi ante alios cibos
 sumere panem Eucharisticum. Idem
 Tertullianus in libro de oratione, in
 fine; *Accepto, inquit, corpore Domini, &
 reservato, utrumque saluum est, & partici-
 patio sacrificij, & executio officij.* Dispu-

tat eo loco, an ieiunium solvatur sumptione Eucharistię. Aliqui affirmabāt; ideoq; diebus ieiuniorum putabant abstinendum esse à cōmunionē. Occurrit Tertullianus, corpus Domini, quod in templo distribuitur, domum deferri posse & reservari ad horam comestionis: sic enim fore ut nec ieiunium violetur, nec communio omitteretur.

XIII. De eadem reservatione Basilii in epistola ad Cæsariam Patriciam sic scribit; *Illud autem, in persecutionis temporibus necessitate cogi quępiam, non præsente sacerdote aut ministro, communionem propria manu sumere, nequaquam esse graue; superuacaneum est demonstrare, propterea quod longa consuetudine, hoc ipso rerum usu confirmatum est. Omnes enim in eremis solitariam vitam agentes, ubi non est sacerdos, communionem domi seruantes, à seipsis communicant. In Alexandria verò & in Ægypto, unus quisq; eorum, qui sunt de populo, ut plurimum habet communionem in domo sua.*

Consentiunt alii Patres citati. Clemens Alexandrinus lib. 1. Stromatum, non longè à principio, ait; *Etiã Eucharistiam cum quidam, vt mos est, diuiserint, permittunt vnicuique ex populo eius partem sumere.* Et Cyprianus serm. de lapsis; *Cum quadam (mulier) arcam suam, in qua Domini sanctum fuit, manibus indignis tentasset aperire; igne inde surgente deterrita est, ne auderet attingere.* Et alius, qui et ipse maculatus, de sacrificio à sacerdote celebrato partem cum ceteris ausus est latenter accipere; sanctum Domini edere et contrectare non potuit, et cinerem ferre se apertis manibus inuenit. Et Hieronymus in Apologia ad Pammachium pro libris suis contra Iouinianum; *An alius in publico, alius in domo Christus est? quod in Ecclesia non licet, nec domi licet.* Et Augustinus serm. 252. de tempore; *Omnes viri, quando communicare desiderant, lauant manus suas; Et omnes mulieres nitida exhibent lintheola, vbi corpus Christi accipiant.*

Ex his Patrum testimoniis perspicuum est, fideles olim solitos esse Eucharisti-

charistiam domum deferre, ibique as-
 seruare ad priuatam communionem.
 Quod autem soliti sint vnā tantum
 speciem deferre & conseruare; facil-
 limè ostendi potest. Primo, quia cita-
 ti Patres vnius tantum speciei memi-
 nerunt. Secundo, quia pleriq; non nisi
 de vna specie intelligi possunt. Quis
 enim credat, sanguinem Christi sub
 specie vini à fidelibus perlatum esse in
 manibus, arca, vel linteolo? corpus
 Christi portari sic potuit; non sanguis.
 Tertio, quia D. Athanasius apologia
 2. contra Arrianos, disertè ait, nullum
 calicem aut poculum mysticum alibi
 reperiri potuisse, nisi in Ecclesia. Quo-
 modo ergo in domibus Laicorum as-
 seruari potuisset sanguis Christi, sine
 poculo aut calice?

XVI.

Hoc argumento conuicti aduersa-
 rii fatentur, vnā speciem fuisse olim
 vsurpatam priuatim in domibus; non
 tamē publicè in Ecclesia. Addit Kem-
 nitius, eos ipsos, qui priuatim sume-
 bant Eucharistiam sub specie panis,
 prius

prius in Ecclesia sumpsisse sub specie vini; ac proinde vtranq; speciem per intervalla temporum usurpasse. Deinde, se non disputare de priuata, sed publica cœnæ administratione. Sed primum quæro ex Kemnitio, vnde sciat, prius calicem in Ecclesia, deinde panem Eucharisticum in priuatis domibus sumptum fuisse à fidelibus? contrarium planè colligitur ex Tertulliano, cum ait, eodem die, & ieiunium, & communionem seruari posse, si corpus Domini ad horam cœstionis asseruetur. Quid opus erat, ratione ieiunii, tamdiu abstinere à corpore Christi, si iam antea calix fuisset degustatus? de Eremitis res clarior est. Quomodo potuissent calicem sumere in Ecclesia, qui toto anno communicabant in eremo, & non nisi rarissimè ad Ecclesiam veniebant? Addo Kemnitium sibi ipsi repugnare. Nam ex vna parte ait, se tantum disputare de eo, quod publice fiebat in Ecclesia; Et ex al-

ex altera fatetur, fideles publicè in Ecclesia solum calicem sumpſiſſe, pane Eucharistico domum aſportato: Ergo fateri debet, vſum vnius ſpeciei fuiſſe publicè vſurpatum in Ecclesia, quod tamen vult negare. Deniq̃, quidquid ſit de contradictione Kemnitii, ſi communio ſub vna ſpecie, licita & vſitata fuit in priuatis Laicorum domibꝯ; certè diuino præcepto prohibita eſſe non potuit. Quod enim ſimpliciter à Deo prohibitū eſt, nec priuatim nec publicè rectè fieri poteſt. Hoc ſenſu dixit Hieronymus loco citato; *Quod in Ecclesia non licet, nec domi licet.*

XVII. Pleſſæus Caluinista, l. 1. de Eucharistia c. 12. pag. 162. prope finem, quia facilè aduertebat hanc Kemnitii ſolutionem defendi non poſſe; aliam viā ingreſſus eſt. Ait, quæ hætenus ex Patribus allata ſunt, nihil aliud, quam muliercularum & idiotarum extraordinarios quosdam abuſus eſſe. Et hoc probat, quia communio priuata, de qua hætenus locuti ſumus, fuit poſtea damnata

nata ab Ecclesia in Concilio Toletano 1. can. 14. & in Cæsaraugustano can. 3. At non esset damnata, si liceret domi communicare. Sed valdè errat Plessæus. Primo, quia citati Patres loquuntur de priuata communione, tanquam de re sancta, & longo fidelium vsu comprobata. Et sanè, si res mala est, cur Alexandriæ & in tota Ægypto tamdiu fuit tolerata? cur Tertullianus eam suasisit in die ieiunii? cur Basilius definiuit, posse Laicos ex propria manu communicare, sicut eo tēpore faciebant Eremitæ? Secundo, falsum est, in citatis Conciliis damnatam esse priuatam communionem. Non fuit damnata, sed prohibita: nec ideo prohibita, quia in se mala, sed propter irreuerentiam, & varios abusus, qui inde sequebantur. Hoc patet ex ipsis verbis. Sic enim loquitur Cōcilium Toletanum can. 14. *Si quis acceptam à sacerdote Eucharistiam non sumpserit, velut sacrilegus propellatur. q. d. Hactenus multi reperiuntur, qui Eucharistiam*

rīstīam acciperent à sacerdote, non ad sacram refectiōem, sed ad illicitos abusus. Deinceps, ne id fiat amplius, singuli participant Eucharistiam à sacerdote acceptam, nec domum secum auferant; alioqui, qui secus fecerit, de sacrilegio suspectus erit, & pro sacrilego reputabitur ac punietur. Eodem sensu definiuit Concilium Cæsaraugustanum can. 3. *Eucharistiæ gratiam, si quis probatur acceptam in Ecclesia non sumpsisse, anathema sit in perpetuum.* Nimirum contra Priscillianistas, qui ut suam hæresim occultarent, publicè cum Catholicis accipiebant Eucharistiam à sacerdote, & nunquam postea sumebant. Hæc nota sunt ex historiis. Vnde miror Plessæum, quod in re manifesta fucum facere voluerit.

XVIII. Quartum argumentum sumi potest ex *communione Laica*, quæ in poenā magni alicuius delicti, olim dabatur Clericis, ablata eis communione clericali. Huius crebra mentio est in decretis

cretis antiquissimorum Pontificum
& Conciliorum. Vide Siricium Pa-
pam epist. 1. cap. 11. Fælicem 3. epist.
1. cap. 2. Concilium Elibertinum can.
76. Sardicense cap. 1. & 2. Agathen-
se c. 33. Toletanum 1. cap. 4. Toleta-
num 4. cap. 17. Braccarense 1. cap. 31.
Cyprianum lib. 4. epist. 2. & alios.
Hoc argumento vitur Bellarminus
l. 4. de Eucharistia, cap. 24. asserens
nomine *Laica communionis* intelligen-
dam esse communionem sub vna spe-
cie. Quod si verum est, argumentum
est efficacissimum pro usu vnius spe-
ciei. Aliqui tamen, non solum ex ad-
uersariis, sed etiam Catholicis, aliter
sentiunt; nempe communionem
Laicam fuisse illam, quam sumebant
olim Laici extra chorum; clericalem
vero, quam sumebant Clerici in
choro. Vtranque tamen sub spe-
cie panis & vini. Constat enim fuis-
se olim moris, vt Laici orarent & cõ-
municarēt extra cācellos per ministe-
rium

rium Archidiaconi : Episcopi vero, sacerdotes, & reliqui clerici intra cancellos. Huc spectat illud ex Concilio Toletano 4. can. 17. *Sacerdotes & Leuita ante Altare communicent; in choro Clerus; extra chorum populus.* Et ex Braccarensi 1. can. 31. *Ingressi sacrarium ad communicandum, non liceat Laicis; nisi tantum Clericis.* Itaque iuxta hanc sententiam, pœna Clericorum, qui deliquerant, in eo erat posita, vt exclusi ex choro, cogerentur extra chorum communicare inter Laicos, & quasi in ordinẽ Laicorum redigerentur. Quod si ita est, non videtur hinc sumi posse argumentum pro communione sub vna specie.

XVIII. Ego de hac re, saluo meliori iudicio, sic sentio. Primo, verũ esse, quod olim Laici extra chorum; Clerici in choro communicarint; Et hoc sensu, aliam fuisse communionem Laicam, aliam Clericalem; quarum vna fuerit distincta ab alia, ratione loci. Vtranq; tamen fuisse publicam. Secundo, verum

rum quoq; esse, quod Clerici in poenam alicuius delicti, soliti sint priuari communione Clericorum; quæ fiebat in choro; & remitti ad communionem Laicorum, quæ fiebat extra chorum. Vtrunq; patet ex Cōciliis citatis, Toletano & Braccarenfi. Adde tertio, præter hanc poenam, fuisse aliã (non nomine, sed significatione) qua nimirum Clerici, propter enormia quædam flagitia, priuabantur communione clericali, & remittebantur ad Laicam, longè alio sensu. Hoc facile ostendo. Nam Fælix 3. loco citato, vult Clericos rebaptizatos abstinere ab omni communione vsq; ad diē obitus, & in ipsa morte non dari illis, nisi communionem Laicam. Et Concilium Sardicense cap. 24. ne in morte quidem dari illam permittit ob crimina quædam grauiora. Sic enim ait; *Ita vt nec Laicam in fine communionem talis accipiat.* Hæc autem testimonia non possunt intelligi de communione Laica iuxta priorem sensum, quia illa fie-

bat publicè in templo; & distinguebatur à clericali, quòd hæc fieret in in choro, illa extra chorum. Nihil tale dici potest de cõmunionem Laica, quæ priuatim dabatur, vel negabatur Clericis in articulo mortis; Ibi enim non habet locum distinctio communionis in choro, & extra chorum. Vnde necesse est, fuisse morem, vt in articulo mortis, Clerici sub vtraq̃, Laici sub vna specie cõmunicarent. Nam alias non video, quid intelligi possit per Laicam communionem, quæ priuatim agrotantibus dari solet. Et hoc optimè confirmant illa verba Concilii Sardicensis, quæ paulo ante citaui; *Ita vt nec Laicam in fine communionem talis accipiat.* q. d. Episcopus, qui tam grande crimen (de quo ibi sermo est) admisit, non solum clericali, sed etiã Laica communionem priuabitur in fine vitæ, id est; non solum communionem vtriusq̃, sed etiam vnius speciei, in poenam tanti delicti, abstinebit. Si hic sensus non est, quis alius esse potest? Si autem

autem hic est, quid amplius requirimus?

Addi possent alia argumenta, de sumpta ex communione ægrotorum, ex communione infantium, & communione ex præsanctificatis; quæ Bel- larminus loco citato persequitur. Sed lubens ea omitto; quia quæ hætenus allata sunt, abunde nobis sufficiunt. Ex iis enim perspicuè constat, vsum vnus speciei ante mille annos, & eo amplius, in Ecclesia Catholica, tum publicè Romæ & Constantinopoli; tum priuatim in Eremo, & in domibus Laicorum, & in articulo mortis, fuisse receptum & approbatum; tametsi propter varios abusus, fuerit aliquando, ad breue tempus, prohibitus & intermissus. Quod in aliis quoque rebus euenire solet. An non trina immer- sio, quæ fit in baptismo, recepta & vsitata fuit tempore Tertulliani? Negari non potest. Et tamen postea in Concilio Toletano 4. can. 5. propter legitimam causam fuit interdicta.

CAPVT. VI.

*Sub vna specie non minus continetur
totus Christus, quam sub
vtraque.*

I. **O** Stendi hætenus, vnã speciem
vsurpatam fuisse, primo à Disci-
pulis in Emaus; deinde à fidelibus æ-
tate Apostolorum; deniq; ab aliis, qui
postea successerunt. Nunc duæ causæ
explicandæ sunt; cur id rectè factum
sit. Vna est; quia sub vna specie non
minus continetur totus Christus, quã
sub vtraq;. Altera, quia non minor
fructus percipitur ex vna, quam vtra-
que, cæteris paribus. Priorem hic ex-
plicabo; posteriorem in sequenti ca-
pite.

II. Circa priorem causam, primo vi-
dendum est quid sentiant Catholici.
Illi ergo sic statuunt. Primo, in Christo
spectari posse carnem, sanguinem, a-
nimam rationalem, & diuinitatem,
seu

seu personam verbi. Secundo, Christum secundum hæc omnia contineri in sacramento Eucharistiæ; & hoc esse, quod dici solet, Christum totum contineri in hoc sacramento. Tertio, Christum non solum sub vtraq. specie simul sumpta, sed etiam sub vna specie separatim accepta, totum contineri; id est, totum sub specie panis, & totum sub specie vini. Quarto, aliter tamen contineri sub specie panis; aliter sub specie vini. Nam sub specie panis contineri solam carnem vi sacramenti; reliqua per naturalem concomitantiam. Contra, sub specie vini, contineri solum sanguinem vi sacramenti; reliqua per concomitantiam. Hæc omnia habentur in Concilio Tridentino sess. 13. cap. 3. & sess. 21. can. 3. & apud D. Thomam in 3. p. q. 76. art. 1. & 2.

Caluinistæ longè aliter sentiunt. *III.*
 Primo, Christum secundum carnem, sanguinem, & animam rationalem, non esse nisi in cœlo; ac proindè tan-

to interuallo abesse ab Eucharistia, quanto cœlum distat à terra. Secundo, hinc fieri, vt nec sub vna, nec sub vtraq; specie, dicatur contineri. Tercio, ridiculum esse, quod docent Catholici de concomitantia. Vide Caluinum l. 4. inst. cap. 17. §. 18. 35. & 47. Et in consensione de re sacramentaria, in fine.

IIII. Lutherani diuisi sunt. Nam aliqui partim cum Catholicis, partim cum Calvinistis conspirant. Cum Catholicis fatentur, Christum esse præsentem in Eucharistia : cum Calvinistis, negant concomitantiam. Itaque secundum illos dicendum esset, solam carnem Christi esse sub specie panis; & solum sanguinem sub specie vini. Animam rationalem sub neutra contineri. Ita videtur sentire Tilmannus Heshusius in libro de sexcentis erroribus Pontificiorum, titulo 17. errore 4. & 18. Hermannus Hamelmannus in libro de communione sub vtraq; specie, & Illyricus in libro contra Sacra-

cramentarios, parte 2. argumento 25.
& parte 3. in solutione 3. obiectionis.

Alii cum Catholicis simpliciter asserunt, totum Christum contineri sub vnaquaque specie, etiam separatim sumpta; vt Ioannes Brentius in confessione Wirtenbergenfi, articulo de Eucharistia, Kemnitius in disputatione de vtraque specie, & omnes alii, qui defendunt vbiquitatem. Nam si totus Christus secundum diuinitatem & humanitatem vbique est, vt ipsi volunt; necesse est, totum esse in pane, & similiter totum in calice.

V.

Caluinistæ alibi refutati sunt; nec egent noua refutatione. Satis sit hoc loco monuisse, eos in Eucharistiæ sacramento nihil reliquum habere, præter nuda symbola panis & vini; quia totam eius substantiam turpissimè abnegarunt, contra expressa Christi verba; *Hoc est corpus meum: Hic est sanguis meus.* Vide plura in disputatione de triplici cœna.

VI.

Lutherani, qui fatentur Christum

VII.

stum in Eucharistia præsentem esse, & tamen negant concomitantiam; hoc vno Scripturæ loco refelluntur, Rom. 6. 9. *Christus resurgens ex mortuis iam nõ moritur; mors illi vltra non dominabitur.* Nam quæro ex ipsis, an caro Christi sit sola sub specie panis, an coniuncta cum sanguine, anima rationali, & diuinitate? Si sola est; mortua est. At Christus non moritur, vt inquit Apostolus. Si coniuncta cum sanguine, anima, & diuinitate; iam totus Christus est sub specie panis, quod contēdimus. Et non est totus vi sacramenti, quia vis sacramenti consistit in illis verbis; *Hoc est corpus meum.* Hæc autem verba, v. sua non significant totum Christum, sed tantum corpus seu carnem. Ergo caro Christi est sub specie panis vi verborum sacramēti; reliqua per concomitantiam.

VIII. Hoc clarius sic explico. Sicut in pomo multa spectari possunt, color, odor, sapor, quantitas, substantia; sic etiam in Christo, diuinitas, anima rationalis.

tionalis, caro, sanguis. Rursum, sicut oculi vi sua non vident totum pomū, sed solum colorem; & tamen, quia color realiter coniunctus est cum odore, sapore, quantitate & substantia, censetur videri totum pomum per naturalem concomitantiam: sic etiā verba illa, *Hoc est corpus meum*, vi sua nō significant totum Christum, sed tantum carnem Christi; & tamen, quia caro Christi realiter vnita est sanguini, animæ rationali & personæ verbi, cēsetur totus Christus significari per realem vnionem seu concomitantiam. Porro, quia verba, quod significant, hoc efficiunt; quod de significatione dictum est, de efficientia quoq; intelligi debet. Et quid hic monstri est, quod tantopere metuunt aduersarii? Nihil sanè. Perinde est, ac si dicam, me quidem inuitasse solum Ioannem prædium; sed tamen quia Petrus cum eo erat, à quo nolebat diuelli venisse cū eo Petrum.

Ex dictis sic cōclud; Si totus Christus

IX.

stus non minus continetur sub vna specie, quàm sub vtraque; perinde erit, cæteris paribus, siue sub vna, siue sub vtraque Eucharistiam accipiamus. Semper enim accipiemus eundem Christum; & quidem totum ac integrum. At prius verum est: Ergo & posterius.

X.

Et confirmari potest à simili. Faciamus legatum mille florenorum à testatore relictum tibi esse, & totum in duplici codicillo descriptum contineri; nec minus tibi profuturum, si vnum, quàm si vtrumque codicillum ab hæredibus testatoris accipias. Sane, si hæredes alterum codicillum tibi offerant, cuius vigore totum legatum percepturus es; quid habes, quod queraris? Nihil video. Nam æquè certus es de tota pecuniæ summa, per vnum, quàm per vtrumque codicillum; ne aliunde quicquam pateris detrimentum. Planè sic res habet in nostro proposito. Totum Christum accipis, non minus sub vna, quàm sub vtra-

vtraq; specie. Quid ergo queri potes?

Sed multo luculētius Scriptura nobis hoc explicat similitudine *Manna*, quæ fuit figura Eucharistiæ. Sic enim legimus, Exodi 16. 17. *Feceruntq; ita filij Israel, & collegerunt, alius plus, alius minus. Et mensi sunt ad mensuram gomor: Nec qui plus collegerat, habuit amplius; nec qui minus parauerat, reperit minus: sed singuli iuxta id, quod edere poterant, congregauerunt.* Nimirum, voluit Deus quasi in figura multo ante significare, nō minus percepturos ex Eucharistia, qui vnā, quā qui duas species accepturi essent; nec plus, qui duas, quā qui vnā sumpturi.

Hinc vltterius infero, Catholicos merito beatos; Lutheranos & Calvinistas, infelices esse. Nam Catholici iuxta Scripturam, non minus sub vnā, quā sub vtraque specie percipiunt. Semper enim exhibetur illis totus & integer Christus. Lutherani verò, siue sub vnā, siue sub vtraq; specie cōmunicent, nunquā totum Christū, sed sub vnā

XI,

XII,

vna specie solam carnem, & sub altera solum sanguinem putant se accipere. Et quia id falso putant (Christus enim non moritur, vt ait Apostolus; ideoq; caro non est sine sanguine, anima & diuinitate) non plus accipiunt, quàm Calvinistæ, id est, nihil. Perinde enim est, siue dicas cum Calvinistis, Christum omnino præsentem non esse in Eucharistia; siue cum Lutheranis, Christum mortuum præsentem esse. Vtrunq; enim impium, & sacrilegum est.

CAPVT VII.

Ex vna specie non minor fructus percipitur, quàm ex vtraque.

Hoc planè conficitur ex dictis. Nā si totus Christus, qui est fons omnium donorum supernaturalium, non minus continetur sub vna, quam sub vtraque specie; certè non minor fructus

fructus ex vna, quam ex vtraq. sperari potest. Hoc sensu dixit D. Thomas in 3. p. q. 80. art. 12. ad 3. *Potest à populo sumi corpus sine sanguine; nec exinde sequitur aliquod detrimentum, quia sub vtraque specie totus Christus continetur.* Et Christus ipse, cum de fructu Eucharistiae loquitur, eundem planè effectū tribuit vni speciei, quem vtriq.; Ioan. 6. 51. *Si quis manducauerit ex hoc panē, viuet in aeternum.* Et infra; *Non sicut manducauerunt Patres vestri manna, & mortui sunt. Qui manducat hunc panem, viuet in aeternum.* Huc etiam spectat figura, quæ de manna supra allata est. Sicut enim manna erat cibus corporis: ita Eucharistia est cibus animæ. Et sicut manna non minus satiabat ac reficiebat vires corporis, siue quis plus, siue minus collegisset: sic etiam Eucharistia non minus reficit mentem, siue sub vna, siue sub vtraq. specie sumatur: modo aliunde non sit impedimentum.

Sed vt clarius intelligatur, quod dicimus, explicandum est, quid quisq. sen-

II.

sentiat de fructu Eucharistiæ. Lutherani putant, totum illius fructum in eo consistere, vt fides in nobis excite-
tur aut confirmetur. Fundamentum
eorum duplex est. Vnum, fidem iusti-
ficantem nihil aliud esse, quam fidu-
ciam, qua quis certo persuasus est,
peccata sibi gratuitò remissa esse per
merita Christi, iuxta diuinam promif-
sionem. Alterum, sacramenta institu-
ta esse ad hanc fidem in nobis exci-
tandam & confirmandam. Esse enim
signa quædam sensibilia, quibus Deus
suam promissionem de gratuita pec-
catorum remissione per merita Chri-
sti obsignauit, & nobis reliquit, vt ex
eorum aspectu vel vsu, statim excite-
mur ad certam fiduciam remissionis
peccatorum concipiendam.

III. Ex his fundamentis, quæ tamen
falsa & alibi refutata sunt, ostendo Lu-
theranos, si quem fructum ex Eucha-
ristia percipiunt, non minorem ex vna,
quam ex vtraq; specie, percipere pos-
se, si velint; ac proinde frustra eos vr-
gere

gere vtranq; speciem. Hoc autem sic ostendo. Vel fides excitatur ex aspectu sacramenti; vel ex auditu verborum, quæ recitantur in sacramenti administratione; vel ex ipsa sumptione sacramenti. Si excitatur ex aspectu sacramenti; frustra Lutherani vrgent sumptionem vtriusq; speciei. Primo, quia Laici, tametsi alteram tantum speciem accipiant, possunt tamen vtranque aspicere, quia sacerdos vtranque palam spectandam exhibet. Ergo, si solus aspectus sufficit, quid vrgent sumptionem vtriusq; speciei? Secundo, non minus excitatur fides ex aspectu vnius speciei in Eucharistia, quam ex aspectu vnius mersionis in baptismo: Ergo sicut in baptismo non requiruntur tres mersiones ad excitandam fidem, sed vna sufficit; sic etiam in Eucharistia non requiruntur duæ species, sed vna sufficit. Tertiò, quando Lutherani communicant sub vtraq; specie, prius vident speciem panis, quàm calicis. Vel
ergo

ergo ex solo aspectu panis excitatur fides, vel non. Si excitatur: quid ulterius volunt? Si non excitatur: quid prodest sumere illam speciem? Dicent, excitari quidem fidem ex aspectu panis Eucharistici: sed confirmari ex aspectu calicis. Sed quæro, an fides excitata ex prior aspectu; sit vera fides iustificans, nec ne? Si est, iam verè credunt Lutherani peccata sibi remissa esse. Ergo iam verè remissa sunt. Quid volunt amplius? an quæ semel verè remissa sunt, indigent noua remissione? Non opinor. Si autem non est vera fides iustificans, quid ergo est? aut quid tandem prodest? Sed esto: fides semel excitata, confirmanda sit. An hoc fieri non potest ex vnius speciei aspectu semel ac identidem repetito? Sicut enim, qui sæpius ac iterato intuetur eandem Christi imaginem, potest sæpius excitari ad commemorandam ipsius mortem & passionem: sic etiam in proposito. Vnde, sicut vna imago, non solum ad excitand-

citandam, sed etiam ad confirmandam recordationem sufficiens est: sic planè sentiendum est de vna specie Eucharistica. An Lutherani putant, vnum biblicorum codicem non sufficere ad excitandam & confirmandam fidem, nisi alter adsit, qui priori suppetias ferat? Si ergo non est alius fructus Eucharistiæ, quam solo aspectu excitare fidem remissionis peccatorum; is sanè æquè percipi potest ex vna, quam ex vtrâq. specie, vt iam ostensum est.

Si autem fides excitatur, non ex aspectu sacramenti, sed ex auditu verborum, quæ in sacramenti administratione recitantur; ne sic quidem vrgeri potest sumptio vtriusq. speciei. Nam Laici non minus audiunt illa verba, quando communicant sub vna specie, quàm quando sub vtrâq. Ergo non minus excitari potest illorum fides in sumptione vnus, quam vtriusque speciei. Imo, quid opus est sumptione Eucharistiæ, si ex solo verborum
f auditu

1111

auditu fides sufficienter excitatur? Satis erit ad fructum illum percipiendum, si minister clara voce recitet verba institutionis ex Euangelio; & Laici ministrum recitantem audiant.

V. Si denique, neque ex aspectu, neque ex auditu, sed ex ipsa sacramenti sumptione fides excitatur; quid tandem illud est, quo potissimum excitatur? Nam multa spectari possunt in sumptione. 1. externa actio sumendi. 2. interna fides & deuotio sumentium. 3. species panis & vini, quæ sumuntur. 4. corpus & sanguis Christi, quæ sub illis speciebus continentur. Quid ergo ex his omnibus est, quod fidem excitat in Lutheranis? An externa sumptio? At illa saluari potest in vna specie. An interna fides & deuotio? At sic fides seipsam excitaret. Imo fides adesset; antequam excitaretur. An species panis & vini? At cum vna species contineat totum Christum, non minus, quam ambæ simul; cur vna non sufficiat? An denique corpus &

& sanguis Christi? At iam dixi, hæc non minus sub vna, quàm sub vtraque specie contineri.

Vident, opinor, Lutherani, quocumque tandem se vertant, non minorem fructum inuenire se posse in vna, quàm in vtraque specie; ac proinde, ex hoc capite, non rectè vrgere vtranque speciem. Hoc vnū, coronidis loco, ab iis quæro; an per illam fidem, quæ in hoc sacramento in ipsis excitatur, credant Christum viuum præsentem esse in Eucharistia, an mortuum? Si mortuum; errant, quia Christus iam non moritur, vt ait Apostolus. Si viuum; etiam errant, saltem sua opinione, quia putant solam carnem esse sub specie panis, & solum sanguinem sub specie vini. At nec sola caro, nec solus sanguis, in se vitam habet. Ergo quidquid credunt, illorum fides erronea est. Quomodo ergo iustificat? Etiam, procul dubio, erroneè.

VI.

f 2

Venio

VII. Venio ad Caluinistas & Zuinglianos. Quid illi sentiant de fructu Eucharistiæ, ne ipsos quidem scire arbitrator. Omnia apud ipsos dubia sunt: Et præsertim hæc tria, quæ ad rem maximè faciunt. 1. an Christus sit realiter præsens in hoc sacramento. 2. quomodo comedatur & bibatur in hoc sacramento? 3. quis sit fructus manducationis & bibitionis sacramentalis? Hæc inquam, dubia & incerta sunt apud Caluinistas. Expendamus singula seorsim. Ac primum quero, an Christus sit realiter præsens in hoc sacramento? Calvinus nunc affirmat, nunc negat. Affirmat in cap. ii. prioris Corinthiæ, his verbis; *Concludo, realiter, ut vulgo loquuntur, nobis in cœnâ dari corpus Christi.* Negat in consensione de re sacramentaria, in fine, his verbis: *Quia tamen Christi corpus finitum est, & cœlo ut loco continetur, necesse est à nobis tanto locorum intervallo distare, quanto cœlum abest à terra.* Calvinum imitatur Plessæus, qui lib. 4. de Eucharisti-

charistia c. 3. pag. 675. in fine, negat
realem præsentiam, quam tamen an-
tea, cap. 2. pag. 660. asseruerat his
verbis; *Dum sacra cæna ex præscripto Chri-
sti celebratur, Christum realiter & substan-
tialiter accipimus.*

Secundo quæro: quomodo man- *VIII.*
ducetur & bibatur Christus in hoc
sacramento? In hac re Calvinistas &
Suinglianos dissentire, fatetur Calui-
nus ipse l. 4. inst. c. 17. §. 5. cum ait;
*Sed hoc non perinde inter omnes cõuenit, qua-
lis sit eius participandi ratio. Sunt enim, qui
manducare Christi carnem, & sanguinem
eius bibere, vno verbo definiunt nihil esse al-
liud, quàm in Christum ipsum credere. Sed
mihi expressius quiddam ac sublimius vide-
tur voluisse docere Christus in præclara illa
concione, vbi carnis suæ manducationem no-
bis commendat, nempe vera sui participatio-
ne nos viuificari. Quid autem hoc est?
Sequitur paulo post; Interim verò hanc
non aliam esse, quàm fidei manducationem
fatemur, ut nulla alia fingi possit. Verum
hoc inter mea & istorum verba interest, quod*
f 3 illis

illis manducare est duntaxat credere: ego credendo manducari Christi carnem, quia fide noster efficitur, eamque manducationem fructum effectumque esse fidei dico. Hæc Calvinus. Qui potest capere, capiat. Quid Plessæus? Multo facilius se expedit.

Ait Christum non aliter manducari & bibi in Eucharistia, quàm in baptismo. Sic enim loquitur l. 4. c. 3. pag. 672. *Cibus in sacra cœna, fons in sacro lauacro: Et utrobique Christus eodem modo.* Et paulo post; *ut Christus proinde in sacra cœna non aliter, quàm in baptismo, suscipiatur, capiatur, gustetur.* Et quomodo suscipitur, manducatur & bibitur in baptismo? Non aliter, inquit alibi, quàm in verbo Dei, id est, sola fide. Ergo Plessæus iam discedit à Caluino; & nihil plus vult tribuere Eucharistiæ, quàm baptismo.

Pag. 654

IX. Tertio quæro; quis sit fructus manducationis & bibitionis sacramentalis? Secundum Calvinum, est certitudo seu securitas de vita æterna.

Imo

Imo, tanta certitudo & securitas, vt non magis possimus amittere regnum cœlorum, quàm Christus, qui iam illud ingressus est. Sic enim habet Calvinus l. 4. inst. c. 17. §. 2. *Magnum verò fiducia ac suauitatis fructum ex hoc sacramento colligere possunt piæ animæ, quod testimonium habent in vnum corpus nos cum Christo coaluisse, vt quidquid ipsius est, nostrum vocare liceat. Hinc sequitur, vt nobis securè spondere audeamus, vitam æternam nostram esse, cuius ipse est haeres: nec regnum cœlorum, quo iam ingressus est, posse magis nobis excidere, quàm ipsi: rursus peccatis nostris non posse nos damnari. Speciosa verba. Longè aliter Plessæus Calvinista lib. 4. de Eucharistia cap. primo, pag. 652. vbi disertè affirmat, eundem esse fructum Eucharistiæ & Agni paschalis: Et generatim loquendo, eandem esse vim, præstantiam, & effectum sacramentorum vtriusq; populi, Iudæici & Christiani, Inter alia sic ait;*

Quæ igitur Christianorum prærogativa? & sacramenta nostra veteribus quid præstant? Responsio in promptu est. Sermonis prophetici & Apostolici eadem virtus, Christus utrobique, sibi ipsi par & similis. Idem de sacramentis utriusque populi dicendum. Ergo, secundum Plessæum, eundem fructum nos percipimus ex Eucharistia, quem olim Iudæi ex esu Agni paschalis. Quid hinc colligis? Si Plessæo credimus, Christianos esse pares Iudæis; si Caluino, pares Christo in cœlo existentibus.

- X. Vides, nihil certi esse apud Calvinistas, quando de rebus ipsis agendum est. At cum de nudis symbolis mouetur controuersia, omnes constanter urgent utranque speciem. Et cur id quaeso? An Christus magis sub utraque, quam sub vna præsens est? At secundum ipsos, nec sub vna, nec sub utraque præsens est; sed cœlo tantum continetur. An manducatur & bibitur sub utraque potius, quam sub vna? At secundum Plessæum, non aliter man-

manducatur & bibitur in Eucharistia, quàm in baptismo. Si ergo una mensio sufficit ad manducandum & bibendum Christum in baptismo; cur una species non sufficiat in Eucharistia? An maior fructus sperari potest ex utraque specie, quàm ex una? At quis ille fructus est? Non alius secundum Calvinum, quàm facere nos certos & securos de vita æterna. At ille fructus, secundum principia Calvinistarum, habetur ante perceptionem Eucharistiæ; quod sic ostendo. Vel enim sermo est de prædestinatis, vel de reprobis. Si de reprobis, illi nunquam certi sunt de vita æterna. Si de prædestinatis, illi per fidem iustificantem habent hanc certitudinem. At fides iustificans præcedit perceptionem Eucharistiæ. Quid ergo, si fructum querimus, confert Eucharistia? aut quid potius utraque species, quàm una prodest? Nihil video, si Caluini sequaris principia. Prædestinati omnes fidem habent, quæ deficere non potest. Per

hanc securi sunt de vita æterna. Imò, omnes fidelium filii ante baptismum continentur in fædere promissionis vitæ æternæ: Et sine baptismo saluari possunt; Nec magis futuri in cœlo beati, qui baptismo tincti sunt, quàm qui non sunt. Quid ergo præsidii quærant ex vtrâque, vel altera specie? Frustra est, apud Calvinistas.

XI.

At, inquires, aliter Plessæus sentit de fructu, quàm Calvinus. Scio; sed nihilo melius. Ait fructum Eucharistiæ & Agni pascchalis eundem esse. Ait Christum non aliter in Eucharistia, quàm in baptismo manducari & bibi. Ait denique, baptismum nos admittere in fædus Dei; Eucharistiam in eo conservare. Hæc, neque vniuersè vera sunt; neque inter se cohererent; neque rem expediunt. Si enim est idem fructus Eucharistiæ & Agni pascchalis; quomodo dixit Augustinus in psalm. 73. *Sacramenta non sunt eadem; quia alia sunt sacramenta dantiæ* *et salutem;*

salutem; alia promittentia Saluatorem.
 Sacramenta noui testamenti dant salutem;
 sacramenta veteris testamenti promiserunt
 Saluatorem. Rursum, si Christus non
 aliter manducatur & bibitur in Eu-
 charistia, quam in baptismo; quo-
 modo alius est fructus baptismi, nem-
 pe admittere nos in fœdus Dei; & a-
 lius Eucharistiæ, nempe in eodem fœ-
 dere nos conseruare? Denique, si per
 Eucharistiam conseruamur in fœde-
 re; quomodo, id potius per vtran-
 que speciem fit, quam per vnâ? Et
 quæro; si prædestinati sub vna tan-
 tum specie communicarent, an con-
 seruarentur in fœdere, nec ne? Si con-
 seruarentur; res salua est. Sin minus;
 quid de iis futurum esset? Dices, con-
 seruandos quidem, non tamen vi-
 nius speciei; sed vi prædestinationis.
 At idem dicturus esses in sumptio-
 ne vtriusque speciei. Nam etiam
 tunc, vi prædestinationis conseruari-
 tur. Quid ergo, si fructum specte-
 mus,

mus, interest inter vnam & vtranque speciem? Nondum video. Nisi forte ad præceptum recurras. Sed de hoc infra. Nunc solum de fructu disputamus.

XII. Relinquo Calvinistas, quia nihil solidi apud ipsos inuenio. Negant præsentiam Christi in Eucharistia, contra apertam Scripturæ & sanctorum Patrum sententiam. In explicanda manducatione & bibitione sacramentali, penitus inter se dissident, Nullum fructum, qui huic sacramento proprius ac peculiaris sit, proferre omnino possunt. Quanto solidior, verior, & salubrior est Catholicorum doctrina, quæ initio capitis à me proposita, his paucis assertionibus, breuiter explicari potest.

XIII. Prima Assertio, Christus in sacramento Eucharistiæ, sub specie panis & vini, verè, realiter & substantialiter præsens est; ideoque hoc sacramentum dicitur constare, partim speciebus sacramentalibus, quæ oculis cernuntur; partim

partim corpore & sanguine Christi, quæ sub illis speciebus latent. Matthi. 26. 26. *Hoc est corpus meum. Hic est sanguis meus.* Cyrillus Hierosolymitanus catechesi 4. mystagogica; *Cum Christus ipse dicat, Hoc est corpus meum, quis deinceps audeat dubitare?*

Altera Assertio. Hoc sacramentum X IIII,
 institutum est, non vt homines per peccatum mortui, vitam spiritualem inde percipiant; sed vt homines per gratiam viui, nutriantur, & maiores vires acquirant. Hinc rectè vocatur *cibus, potus, esca, viaticum.* Nam sicut homo, qui corporaliter viuit, indiget cibo & potu corporali, ad se nutriendum & conseruandum corporaliter; sic etiam, qui viuit spiritualiter, indiget cibo & potu spirituali, ad se nutriendum & conseruandum spiritualiter. Ioan. 6. 53. *Nisi manducaueritis carnem filij hominis, & biberitis eius sanguinem, non habebitis;* id est, non conseruabitis vitam in vobis. Rursum, sicut homini corporaliter mortuo non prædest cibus aut

aut potus corporalis; ita homini per peccatum mortuo non prodest, sed potius obest cibus & potus Eucharistiæ. I. Corinth. II. 28. *Probet autem se ipsum homo, & sic de pane illo edat, & de calice bibat. Qui enim manducat & bibit indigne, iudicium sibi manducat & bibit, non diiudicans corpus Domini.*

XV. Tertia Assertio. Hoc interest inter corporalem & spiritualem nutritionem, quod illa fiat cibo & potu, tanquam duabus rebus distinctis; ut aliud sit cibus, & aliud potus: Hæc autem fiat vna re, quæ simul cibus, simul potus sit. Itaque Christus, qui totus continetur sub specie panis, sub illa eadem specie cibus & potus est: idemque Christus, qui etiam totus continetur sub specie vini, sub eadem quoque specie, cibus & potus est. Non enim differt cibus & potus in spiritali refectioe, sicut differt in corporali. Vnde manducare & bibere, esurire & sitire, indifferenter pro eodem sumuntur in scriptura. Matth.

§. 6. *Beati, qui esuriunt & sitiunt iustitiā,
quoniam ipsi saturabuntur. Ioann. 6. 35.
Ego sum panis vitæ: qui venit ad me, non
esuriet, & qui credit in me, non sitiet vn-
quam.*

Quarta Assertio. Hinc fit, vt perin- XVI,
de sit, si nutritionem spiritualem spe-
ctes, siue sumas Christum sub specie
panis tantum, siue sub specie vini tan-
tum, siue sub vtrâque simul: quia ubi-
que totus est; ubique cibi ac potus ra-
tionem habet; & consequenter, ubi-
que plenam refectionem præstare
potest. Vnde non minor fructus per-
cipitur ex sumptione vnius, quam
vtriusque speciei. Cùm enim totus
fructus pendeat à Christo, tanquam
à fonte bonorum omnium spiritua-
lium: & is æquè sub vna, atque sub
vtrâque specie præsens sit: æquè sub
vna, atque sub vtrâque, cibi & potus
rationem habeat: necesse est, non
minorem fructum ab vna, quàm ab
vtrâque specie sperari posse. Vide, quæ
supra dixi, §. 1.

Quinta

XVII. Quinta Assertio. Porro in perceptione huius sacramenti, duplex manducatio distinguenda est: vna sacramentalis, altera spiritualis. Eos dicimus sacramentaliter manducare Christum, qui hoc sacramentum, in quo Christus sub speciebus sacramentalibus continetur, ore corporali accipiunt, & in stomachum traiciunt. Eos autem spiritualiter, qui quando ore corporis sacramentaliter manducant Christum sub speciebus sacramentalibus, simul etiam percipiunt spirituales animæ refectioem, id est, gratiam sacramentalem, qua anima spiritualiter pascitur & nutritur. Prior manducatio communis est bonis & malis. Omnes enim tam boni, quam mali, possunt ore corporis accipere Christum in Eucharistia: sicut undecim Apostoli boni, & Iudas proditor. Posterior, propria iustorum est. Hi enim soli percipiunt spirituales fructus ex sacramentali manducatione. Est autem duplex hic fructus: alter consistit

fistit in augmento gratiæ & charitatis habitualis; alter in auxiliis gratiæ excitantis, quibus Deus nos præuenit, inuitat, & corroborat ad bene beateq; operandum. Sicut enim in nutritione corporis, non solum augetur caro, sanguis & ossa; sed etiam excitantur spiritus sensitiui & vitales, qui apti sunt ad actiones sensitiuas & vitales promptè exequendas: sic in nutritione animæ, non solum augetur gratia habitualis, & alia dona permanentia, sed etiam excitantur motiones diuinæ ac supernaturales, quibus homo iustus suauiter impellitur & corroboratur ad pia opera promptè exercenda. Atque hæc breuiter dicta sint de sententia Catholicorum. Nam cætera, quæ subtiliora sunt, in scholis disputaui-
mus.

Sunt tamen quædam obiectiones *XVIII.* diluendæ, quæ non quidem ab aduersariis, sed ab ipsis Catholicis, exercitii causa, opponi solent; idq; eo fine, ut quod hætenus dictum est, melius intelli-

telligatur & explicetur. Prima est; si Christus sub vna specie continetur semel totus, & sub altera semel totus; Ergo sub vtraq; continetur bis totus: Ergo plus confert sub vtraque, quam sub vna. Respondeo. Negatur vltima consequentia; quia etiam sub vna parte panis consecrati continetur semel totus; & sub duabus partibus bis totus; & tamen, si fructum spectes, perinde est, siue quis sumat vnā, siue duas aut tres particulas panis consecrati. Idem est de vino consecrato. Alius plus, alius minus bibit ex eodem calice; & tamen fructus non ideo maior aut minor est.

XIX.

Secunda obiectio. Vnaquæq; species per se confert effectum suum: Ergo plus conferunt duæ, quam vna. Respondeo cum distinctione. Quando vna species sola sumitur per modum vnius refectionis, tunc confert totum illum effectum, quem conferunt ambæ species simul sumptæ per modum vnius refectionis. Quando
autem

autem vna species sumitur cum alia,
 tunc partialiter confert eundem effe-
 ctum. Simile est, de duabus particulis
 panis consecrati, aut de duobus hau-
 stibus vini consecrati. Dices; vel to-
 tus effectus datur in sumptione pa-
 nis; vel totus in sumptione vini; vel
 pars in sumptione panis, & pars in
 sumptione vini. Si totus in sumptio-
 ne panis; iam nihil efficit sumptio
 vini. Si totus in sumptione vini; ni-
 hil efficit sumptio panis. Si pars in
 sumptione panis, & pars in sumptio-
 ne vini; ergo plus prodest sumptio
 vtriusque, quàm vnius speciei. Re-
 spondeo. Idem argumentum fieri
 potest de sumptione duarum parti-
 cularum panis consecrati; aut de ite-
 rato haustu calicis; aut de triplici
 mersione in baptismo. Dicendum
 ergo est, totum effectum conferri
 in sumptione panis: absolutè qui-
 dem, si altera species non sequa-
 tur; in ordine verò ad alteram, si
 sequatur. Sicut, si habeas du-

duplicem particulam hostiæ; totum effectum consequeris in sumptione prioris: absolutè, si illam solam sumptueris; in ordine verò ad alteram, si illam adieceris. De duplici haustu par proportio est.

XX.

Tertia obiectio. Licet totus Christus sit sub vna specie non minus, quàm sub vtraque; tamen, vt supra dictum est, vi verborum sola caro est sub specie panis, & solus sanguis sub specie vini: Ergo vi verborum plus continent due species, quàm vna: Ergo etiam plus efficiunt. Respondeo. Parum refert ad effectum Eucharistiæ, an caro vel sanguis Christi sit ibi vi verborum, an per naturalem concomitantiam. Hoc satis est, quod totus Christus non minus sit sub vna specie, quàm sub vtraque. Nam effectus Eucharistiæ non pendet immediatè à vi verborum, sed ab ipso Christo, qui est præsens in sacramento. Vt hoc melius intelligatur, distinguendi sunt duo effectus, qui pendent à diuersis causis. Vnus est præ-

præsentia Christi in Eucharistia sub speciebus sacramentalibus. Hic immediatè efficitur vi istorum verborû; *Hoc est corpus meum: Hic est sanguis meus.* Alter est gratia sacramentalis, seu interna animæ nutritio & resectio. Hic immediatè efficitur à Christo iam præsentem: Et de hoc disputamus.

Quarta obiectio. Duæ species simul sumptæ plus significant, quàm vna: Ergo etiam plus efficiunt; quia efficientia respondet significationi. Antecedens patet, quia duæ species significant integrum conuiuium, constans cibo & potu: Vna species significat alteram tantum partem conuiuii; vt species panis, solum cibum; & species vini, solum potum. Respondeo cum distinctione. Nam significatio sacramentalis dupliciter spectari potest. Primo, ex parte rei significatæ. Secundo, ex modo tantum significandi. Hoc ostendo in baptismo. Exterior enim ablutio spectatur semel, quatenus significat internam ablutionem à


XXI.

peccatis; & semel, quatenus eam significat, vel per vnam, vel per trinam immersionem. Idem est in Eucharistia. Nam hoc sacramentum spectatur semel, quatenus significat internam animæ refectionem; & semel, quatenus eam significat, vel vnius, vel vtriusque speciei sumptione. Si ergo priori modo spectetur, significatio illius semper est æquè perfecta, quia semper est eadem res significata, nempe reformatio animæ. Si posteriori, perfectior est significatio sub vtrâque, quàm sub altera tantum specie, quia modus significandi est perfectior. Efficientia tamen sacramenti non respondet significationi ex parte modi significandi, sed ex parte rei significatæ.

XXII. Quinta obiectio. Si quis in triduo mortis consecrasset Eucharistiam, nõ percepisset tantum fructum ex vna specie, quantum ex vtrâque, vt multi fatentur. Ergo neq; nunc percipimus tantum ex vna, quàm ex vtrâque, quia Eucharistia iam non est alia, quam
tunc

tunc fuisset. Respondeo. Non est simile. Nam in illo triduo Christus erat mortuus; & non solum corpus ab anima, sed etiam caro à sanguine separata. Nunc autem vivus est. Unde si in illo triduo fuisset facta consecratio; tunc sub specie panis fuisset caro sine sanguine & anima rationali; & sub specie vini fuisset sanguis sine carne & anima rationali. Plus ergo fuisset sub vtraque specie, quàm sub vna. Hinc aliqui putant, maiorem etiam fructum ab vtraque, quàm ab vna percipi potuisse. Mihi tamen non videtur hoc sequi. Nam vis & efficacia huius sacramenti, non pendet præcisè à carne & sanguine, sed potius à Diuinitate, seu persona verbi. Cum ergo in triduo mortis caro Christi, licet à sanguine esset separata, manserit tamen coniuncta cum Diuinitate seu persona verbi; retinuit eandem vim & efficaciam, quàm nunc habet. Ergo etiam in illo triduo, non maior fructus ab vtraque specie, quàm ab vna tantum, sperari potuisset.

XXIII. Sexta obiectio. Si est tantus fructus
 vnius speciei, quantus vtriusque; qua-
 re Christus vtranq; instituit? & quare
 sacerdotes non sunt vna contenti, si-
 cut iubent Laicos esse contentos? Re-
 spondeo. Eucharistia non solum est
 sacramentum, sed etiam sacrificium
 nouæ legis. Igitur ratio sacramenti sal-
 uari potest in vna specie; ratio sacrifi-
 cii requirit vtranq; speciem. Laici er-
 go, qui Eucharistiam accipiunt, vt sa-
 cramentum est, vna specie contenti
 sunt. Sacerdotes autem, qui illam, vt
 sacrificium offerunt, vtranq; speciem
 ysurgere debent. Plura de hac rei in
 materia de sacrificio Missæ. Hæc
 pauca pro hoc loco
 sufficiant.



CAPVT. VIII.

*Quæ sint causæ, cur potius sub vna,
quàm sub vtrâque specie,*

*Laici communi-
cent?*

HActenus explicatæ sunt duæ
causæ, cur Laici non minus sub
vna, quàm sub vtrâq. specie commu-
nicare possint. Prior est, quia totus
Christus non minus sub vna, quàm
sub vtrâq. continetur. Posterior, quia
non minor fructus ex vna, quàm ex
vtrâq. percipitur. Nunc aliæ causæ ad-
ferendæ sunt, cur expediat eos sub v-
na specie potius, quàm sub vtrâq. cõ-
municare. Sunt autem potissimū tres.
Prima, quia multi sunt abstemii à vi-
no. Altera, quia vinum multis locis
haberi non potest, præsertim in tanta
copia, vt multa hominum millia pos-
sint communicare. Tertia, quia in tã-
ta communicantium multitudine, sæ-

I.

pè esset periculum effusionis aut irreuerentiæ.

II. Hæ causæ sufficientes sunt, si semel statuamus (quod hæctenus probatum est, & infra rursus confirmabitur) vtrāq; speciem iure diuino non esse necessariam, sed alterā sufficere: Nec plus utilitatis ex vtrāq; quàm ex alterā percipi posse. Nam si ita est, prudēter abstinere possumus à calice, propter rationes iam allatas. Nec id negant aduersarii. Solum vrgent præceptum de vtrāq; specie, de quo iam nō agimus. Excluso ergo præcepto, nihil est, quod amplius obiiciant.

III. Imo, quod magis miror, illi ipsi, qui præceptum vrgent, putant eas causas, quas iam attuli, tanti momenti esse, vt vna species licitè vsurpari possit. Nam Ioannes Brentius in Apologia pro cōfessione Wirtenbergenſi fatetur, abstemios posse sub vna specie communicare. Et Philippis Melanchthon in libro de vsu integri sacramenti, affirmat, Ruthenos ob vini inopiam rectè factu-

facturos, si pro vino vterentur medone, seu aqua mellita.

Ex hac illorum concessione sic argumentor. Si abstemii & Rutheni possunt licite communicare, & fructum Eucharistiæ percipere, sine specie vini; cur non similiter alii? Dicent sine dubio, obstare præceptum Christi: abstemios & Ruthenos excusari ab observatione præcepti; reliquos non ite. Sed frustra. Sic enim insto; Brentius, Philippus, & alii aduersarii, putant præceptum Christi in eo consistere, ut vna species non sumatur sine altera; vel ut ipsi loquuntur, ut sacramentum Eucharistiæ non mutiletur altera sui parte: Et sacrilegos esse, qui id faciant. Sanè, si ita est, Brentius, Philippus & alii Lutherani omnino sacrilegi sunt, qui contra præceptum Christi, permittunt abstemiis & Ruthenis sacramentum altera sui parte mutilatum. Addo hoc dilemma; vel iure diuino prohibitum est communicare sub altera tantum specie, vel non est.

Si

Si prohibitum est, cur permittitur abstemiis? Si non est, cur reliquis negatur?

V. Ex dictis colligo hæc duo principia. Vnum est; omnes, tam Catholici, quàm aduersarii, permittunt abstemiis communionem sub altera tantum specie; nec vnquam auditum est à temporibus Apostolorum ad nos vsq; abstemios fuisse à communione exclusos. Alterum est; Nulli, nec Catholici, nec aduersarii, possunt dispensare in præcepto diuino; sed quidquid diuino iure mandatū est, vt fiat, hoc omnino fieri debet; Et quidquid diuino iure prohibitum est, ne fiat, hoc nullo modo fieri debet. Hinc ita concludo; Ergo vel communio sub vna specie, non est prohibita iure diuino, quod nos contendimus; vel, si prohibita est, non potest fieri dispensatio in illa prohibitionē. Et sic abstemii erunt repellendi à communione. Eligant hic aduersarii, quod volunt.

CAPVT IX.

*Ecclesia legitimè statuit, vt Laici
communicent sub vna
specie.*

SI spectemus ius diuinum, semper
in Ecclesia fuit liberum Laicis, vel
sub vna, vel sub vtraq; specie commu-
nicare, vt haftenus ostensum est. Si au-
tem spectemus ius Ecclesiasticum, res
aliter habet. Nam diuersis temporib;
propter diuersas causas & occasiones,
fuerunt etiam diuersa praecepta Eccle-
siastica de hac re. Et quidem Gelasius
Papà, quia videbat suo tempore Ma-
nichæos ex falsa superstitione semper
abstinere ab altera specie: planè sta-
tuit, vt nemo, nisi sub vtraq; specie cõ-
municaret: alioqui fore, vt Maniche-
us haberetur, qui à calice abstineret.
Contra verò, Patres in Concilio Con-
stantiensi, quia videbant Hussitas in
Bohemia, pertinaciter vrgere vtrāq;
spe-

speciem tanquam ad salutem necessariam: cum tamen Catholici passim sub altera cōmunicarent: vsum vtriusque speciei, respectu Laicorum, penitus sustulerunt: non sanè, quod putarent esse malum & illicitum: sed partim, vt hac ratione, Hussitarum errorem corrigerent & damnarent: partim etiam, vt consuetudinem cōmunicandi sub vna specie, quæ tum multis locis recepta erat, suo decreto approbarent, & sic in tota Ecclesia, maior conformitas & concordia seruaretur. Accedebant etiā & aliæ causæ, quas superiori capite explicauimus.

II. Propter has igitur prudenter statutum est, vt Laici sub vna specie deinceps communicarēt. Nec sine Exemplo id factum est. Nam simile quid contigit olim circa merfionē baptismi. Sicut enim iure diuino semper liberum fuit communicare sub vna, vel sub vtracūque specie: sic etiam iure diuino liberum fuit, vnā vel trinā merfionem adhibere in baptismo. Et rursum
sicut


sicut hac libertate nō obstatē, Ecclesia
nunc sub vna, nunc sub vtraq. specie,
voluit Laicos Eucharistiam accipere:
sic etiam, nunc vnā, nunc triplicem
merfionem voluit adhiberi in baptis-
mo, propter diuersas causas diuersis
temporibus occurrentes. Et quidem
in primitiua Ecclesia, triplex merfio
fuit imperata, ad designandam Trini-
tatem personarum in vna Deitate: id-
que propter hæreticos illius tempo-
ris, qui negantes Trinitatem, vna mer-
fione baptismum conferebant. Hoc
patet ex canone 49. Apostolorū, qui
sic habet: *Si quis Episcopus aut presbyter
non trinam merfionem vnius mysterij cele-
bret, sed semel mergat in baptismo, depona-
tur.* Vide etiam Tertullianum in libro
de corona militis, & Gratianum de
consecratione, dist. 4. cap. 78. Post-
ea vero noui hæretici orti sunt, qui pu-
tabant baptismum iterandum esse,
ideoque baptizatos rebaptizabant.
Ad hunc errorem corrigendū, statutū
fuit in Concilio Toletano 4. can. 5.

vt vna merfione baptifmus conferretur, ad designandam vnitatem mortis Chrifti. Cum enim baptifmus repræfentet nobis Chrifti mortem & paffionem, iuxta illud Rôm. 6. 3. *Quicunque baptizati fumus, in Chrifto Iefu, in morte ipfius baptizati fumus*: Et Chriftus femel tantum mortuus fit: nullo modo baptifmus iterandus eft, fed femel tantum conferendus. Vnde Apoftolus Hebr. 6. 6. contra eos, qui putabant in noua lege baptifmum repeti poffe, ficut in veteri repetebatur lotiones & baptifmata, fic ait: *Rursum crucifigentes fibimet ipsis filium Dei, et ostentui habentes*. Et ad Ephes. 4. 5. *Vnus Deus, vna fides, vnum baptifma*.

111. Dices: Vnde habet Ecclefia hanc potestatem, vt poffit in alteram partem definire & ftatuere id, quod iure diuino liberum relictum eft. Ratio dubitandi eft, quia quidquid iure diuino permittitur omnibus Chriftianis, hoc folo iure humano negari aut tolli non potest. Cum ergo iure diuino, in baptifmo

ptissimo liberum sit, vnam vel trinam
 mersionem adhibere: & similiter in
 Eucharistia liberum sit, sub vna vel vtra-
 que specie communicare; quo iure
 potest Ecclesia, vel vnam mersionem in
 baptismo, vel vtranq. speciem in Eu-
 charistia prohibere? Respondeo, Ec-
 clesia, vel potius Prælati Ecclesiæ, ha-
 bent hanc potestatem à Christo. Sicut
 enim Rex, qui sibi Vicarium in regni
 administratione subrogat, solet quæ-
 dam maioris momenti negotia cer-
 tis legibus definire, & illi præscribere:
 alia in ipsius arbitrio ac potestate re-
 linquere: sic Christus agit cum Pasto-
 ribus Ecclesiæ, quos quasi Vicarios si-
 bi subrogauit. Quæ enim ad sacramen-
 torum substantiam, numerum, & effe-
 ctum pertinent: certis legibus ab ipso
 definita sunt. Reliqua, quæ ceremo-
 niæ & circumstantias attingunt: Pa-
 storum arbitrio ac prudentiæ comen-
 data. Huius generis sunt; baptismum
 conferre semel vel ter immergendo:
 Eucharistiâ sumere sub vna, vel vtraq.
 h spe

XXIII. Sexta obiectio. Si est tantus fructus
 vnius speciei, quantus vtriusque; qua-
 re Christus vtranq; instituit? & quare
 sacerdotes non sunt vna contenti, si-
 cut iubent Laicos esse contentos? Re-
 spondeo. Eucharistia non solum est
 sacramentum, sed etiam sacrificium
 nouæ legis. Igitur ratio sacramenti sal-
 uari potest in vna specie; ratio sacrifi-
 cii requirit vtranq; speciem. Laici er-
 go, qui Eucharistiam accipiunt, vt sa-
 cramentum est, vna specie contenti
 sunt. Sacerdotes autem, qui illam, vt
 sacrificium offerunt, vtranq; speciem
 ysurgare debent. Plura de hac rein
 materia de sacrificio Missæ. Hæc
 pauca pro hoc loco
 sufficient.



CAPVT. VIII.

*Quæ sint causæ, cur potius sub vna,
quàm sub vtraque specie,*

*Laici communi-
cent?*

HActenus explicatæ sunt duæ
causæ, cur Laici non minus sub
vna, quàm sub vtraq; specie commu-
nicare possint. Prior est, quia totus
Christus non minus sub vna, quàm
sub vtraq; continetur. Posterior, quia
non minor fructus ex vna, quàm ex
vtraq; percipitur. Nunc aliæ causæ ad-
ferendæ sunt, cur expediat eos sub v-
na specie potius, quàm sub vtraq; cõ-
municare. Sunt autem potissimū tres.
Prima, quia multi sunt abstemii à vi-
no. Altera, quia vinum multis locis
haberi non potest, præsertim in tanta
copia, vt multa hominum millia pos-
sint communicare. Tertia, quia in tā-
ta communicantium multitudine, sæ-

I.

III.

pè esset periculum effusionis aut irreuerentiæ.

II. Hæ causæ sufficientes sunt, si semel statuamus (quod hætenus probatum est, & infra rursus confirmabitur) vtrāq; speciem iure diuino non esse necessariam, sed alterā sufficere: Nec plus utilitatis ex vtrāq; quàm ex altera percipi posse. Nam si ita est, prudēter abstinere possumus à calice, propter rationes iam allatas. Nec id negant aduersarii. Solum virgēt præceptum de vtrāq; specie, de quo iam nō agimus. Excluso ergo præcepto, nihil est, quod amplius obiiciant.

III. Imo, quod magis miror, illi ipsi, qui præceptum virgēt, putant eas causas, quas iam attuli, tanti momenti esse, ut vna species licitè vsurpari possit. Nam Ioannes Brentius in Apologia pro cōfessione Wirtenbergenſi fatetur, abstemios posse sub vna specie communicare. Et Philippis Melanchthon in libro de vsu integri sacramenti, affirmat, Ruthenos ob vini inopiam rectè factu.

facturos, si pro vino vterentur medone, seu aqua mellita.

Ex hac illorum concessione sic argumentor. Si abstemii & Rutheni possunt licite communicare, & fructum Eucharistiæ percipere, sine specie vini; cur non similiter alii? Dicent sine dubio, ob stare præceptum Christi: abstemios & Ruthenos excusari ab observatione præcepti; reliquos non ite. Sed frustra. Sic enim insto; Brentius, Philippus, & alii aduersarii, putant præceptum Christi in eo consistere, ut vna species non sumatur sine altera; vel ut ipsi loquuntur, ut sacramentum Eucharistiæ non mutiletur altera sui parte: Et sacrilegos esse, qui id faciant. Sanè, si ita est, Brentius, Philippus & alii Lutherani omnino sacrilegi sunt, qui contra præceptum Christi, permittunt abstemiis & Ruthenis sacramentum altera sui parte mutilatum. Addo hoc dilemma; vel iure diuino prohibitum est communicare sub altera tantum specie, vel non est.

Si

Si prohibitum est, cur permittitur abstemiis? Si non est, cur reliquis negatur?

V.

Ex dictis colligo hæc duo principia. Vnum est; omnes, tam Catholici, quàm aduersarii, permittunt abstemiis communionem sub altera tantum specie; nec vnquam auditum est à temporibus Apostolorum ad nos vsq; abstemios fuisse à communione exclusos. Alterum est; Nulli, nec Catholici, nec aduersarii, possunt dispensare in præcepto diuino; sed quidquid diuino iure mandatū est, vt fiat, hoc omnino fieri debet; Et quidquid diuino iure prohibitum est, ne fiat, hoc nullo modo fieri debet. Hinc ita concludo; Ergo vel communio sub vna specie, non est prohibita iure diuino, quod nos contendimus; vel, si prohibita est, non potest fieri dispensatio in illa prohibitionē: Et sic abstemii erunt repellendi à communione. Eligant hic aduersarii, quod volunt.

CAPVT IX.

*Ecclesia legitimè statuit, vt Laici
communicent sub vna
specie.*

SI spectemus ius diuinum, semper
in Ecclesia fuit liberum Laicis, vel
sub vna, vel sub vtraq; specie commu-
nicare, vt haftenus ostensum est. Si au-
tem spectemus ius Ecclesiasticum, res
aliter habet. Nam diuersis temporib;
propter diuersas causas & occasiones,
fuerunt etiam diuersa praecepta Eccle-
siastica de hac re. Et quidem Gelasius
Papa, quia videbat suo tempore Ma-
nicheos ex falsa superstitione semper
abstinere ab altera specie: planè sta-
tuit, vt nemo, nisi sub vtraq; specie cõ-
municaret: alioqui fore, vt Maniche-
us haberetur, qui à calice abstineret.
Contra verò, Patres in Concilio Con-
stantiensi, quia videbant Hussitas in
Bohemia, pertinaciter vrgere vtrancq;
spe-

speciem tanquam ad salutem necessariam: cum tamen Catholici passim sub altera cōmunicarent: vsū vtriusque speciei, respectu Laicorum, penitus sustulerunt: non sanè, quod putarent esse malum & illicitum: sed partim, vt hac ratione, Hussitarum errorem corrigerent & damnarent: partim etiam, vt consuetudinem cōmunicandi sub vna specie, quæ tum multis locis recepta erat, suo decreto approbarent, & sic in tota Ecclesia, maior conformitas & concordia seruaretur. Accedebant etiā & aliæ causæ, quas superiori capite explicauimus.

II. Propter has igitur prudenter statutum est, vt Laici sub vna specie deinceps communicarēt. Nec sine Exemplo id factum est. Nam simile quid contigit olim circa mersionē baptismi. Sicut enim iure diuino semper liberum fuit communicare sub vna, vel sub vtraq; specie: sic etiam iure diuino liberum fuit, vnā vel trinā mersionem adhibere in baptismo. Et rursum
sicut

sicut hac libertate nō obstat, Ecclesia
nunc sub vna, nunc sub vtraq; specie,
voluit Laicos Eucharistiam accipere:
sic etiam, nunc vnā, nunc triplicem
mersionem voluit adhiberi in baptis-
mo, propter diuersas causas diuersis
temporibus occurrentes. Et quidem
in primitiua Ecclesia, triplex mersio
fuit imperata, ad designandam Trini-
tatem personarum in vna Deitate: id-
que propter hæreticos illius tempo-
ris, qui negantes Trinitatem, vna mer-
sione baptismum conferebant. Hoc
patet ex canone 49. Apostolorū, qui
sic habet: *Si quis Episcopus aut presbyter
non trinam mersionem vnius mysterij cele-
bret, sed semel mergat in baptismo, depona-
tur.* Vide etiam Tertullianum in libro
de corona militis, & Gratianum de
consecratione, dist. 4. cap. 78. Post-
ea vero notū hæretici orti sunt, qui pu-
tabant baptismum iterandum esse,
ideoque baptizatos rebaptizabant.
Ad hunc errorem corrigendū, statutū
fuit in Concilio Toletano 4. can. 5.

ptismo liberum sit, vnam vel trinam
 mersionem adhibere: & similiter in
 Eucharistia liberum sit, sub vna vel vtra-
 que specie communicare; quo iure
 potest Ecclesia, vel vnam mersionem in
 baptismo, vel vtranque speciem in Eu-
 charistia prohibere? Respondeo, Ec-
 clesia, vel potius Prælati Ecclesiæ, ha-
 bent hanc potestatem à Christo. Sicut
 enim Rex, qui sibi Vicarium in regni
 administratione subrogat, solet quæ-
 dam maioris momenti negotia cer-
 tis legibus definire, & illi præscribere:
 alia in ipsius arbitrio ac potestate re-
 linquere: sic Christus agit cum Pasto-
 ribus Ecclesiæ, quos quasi Vicarios si-
 bi subrogauit. Quæ enim ad sacramen-
 torum substantiam, numerum, & effe-
 ctum pertinent: certis legibus ab ipso
 definita sunt. Reliqua, quæ ceremo-
 niæ & circumstantias attingunt: Pa-
 storum arbitrio ac prudentiæ comen-
 data. Huius generis sunt, baptismum
 conferre semel vel ter immergendo:
 Eucharistiā sumere sub vna, vel vtraque
 h spe

specie; ante vel post cœnam: domini-
co aut alio die: lotis vel non lotis pe-
dibus: & his similia. De quibus loqui-
tur Apostolus 1. Corinth. 11. 34. cum
ait; *Cætera, cū venero, disponam.* Vide Au-
gustinum epistola 118. ad Ianuarium,
vbi pulchrè de hac re disputat.

CAPVT X.

Soluuntur obiectiones ex scripturis.

- I. **E**Xplicauì hæctenus sententiam Ca-
tholicorū, qui docent nullum ex-
tare præceptum diuinum de vtrâque
specie: ac proinde vnâ speciem lici-
tè vsurpari posse, & semper in Eccle-
sia vsurpatam esse: idque non minori
fructu, quàm si ambæ species vsurpê-
tur. Nunc aduersariorum argumenta
dissoluenda sunt, quæ ipsi cõtra hanc
doctrinam adferunt. Sunt autem tri-
plicia: quædam ex scripturis: alia ex
Patribus: alia denique ex ratione de-
sum-

sumpta. Singula ordine discutiemus.

Et quidem omnes aduersarii, vt supra monui, quærunt in scripturis præceptum de vtrâque specie; nec tamen inueniunt. Hussitæ quærunt in illis verbis, *Nisi manducaueritis carnem filij hominis, & biberitis sanguinem eius*, Lutherani in illis, *Hoc facite*. Calvinistæ in illis, *Bibite ex eo omnes*. Alii ex illis, *Ego enim accepi à Domino, quod & tradidi vobis*. Sunt ergo quatuor obiectiones petitæ ex scripturis, quas iam persequar.

Prima sumitur ex illo Ioann. 6. 53. *Nisi manducaueritis carnem filij hominis, & biberitis sanguinem eius, non habebitis vitam in vobis*. Hic volunt Hussitæ contineri præceptum Christi de vtrâque specie. Nos negamus. Et quod mirum est, nobiscum negant Lutherani & plerique Calvinistæ: non tamen ex eodem principio. Illi, quia putant ibi non agi de sacramentali manducatione: Nos, quia tametsi fateamur agi de sacramentali māducatione, negam⁹ ta-

fieri mentionem vtriusq; speciei. Igitur duo nos asserimus. Vnum, Christum loqui de sacramento Eucharistiæ. Alterum, non tamen, præcipere vtrancq; speciem. In priori suffragantur nobis Hussitæ; in posteriori, Lutherani & multi Calvinistæ. Vtrumq; explicandum est.

IIII.

Primo ergo dicimus, Christum in illo cap. 6. apud Ioannem, loqui de triplici cibo. 1. de materiali. 2. de spirituali. 3. de sacramentali. Sicut enim in aliis reb. solet suos auditores ad ipsum captum instruere, paulatim à nobis ad incognita, à sensibilibus ad occulta, à corporalib. ad spiritualia progrediendo; sic etiam hic facit. Et quidè in principio capitis agit de panibus à se multiplicatis, quibus turbæ corporaliter fuerant pastæ & satiata. Et quia propter hoc miraculū, ipsum sequebantur, inde sumpta occasione hortatur eos, ut potius quærant cibum spiritualem, quam corporalem. *Operamini, inquit, non cibum, qui perit, sed qui perma-*

net in vitam æternam. Hinc ulterius progreditur ad cibum sacramentalē, cum ait; *Panis quem ego dabo, caro mea est, pro mundi vita.* Et iterum; *Nisi manducaveritis carnem filij hominis & biberitis sanguinem eius, non habebitis vitam in vobis.* Ac deinceps; *Caro mea verè est cibus, & sanguis meus verè est potus.* Et deniq; *Non sicut manducaverunt Patres vestri manna, & mortui sunt. Qui manducat hunc panem, vivet in æternū.* Hæc & similia dixit Christus de sacramentali manducatione suæ carnis, & bibitione sui sanguinis. Et credebat illi Petrus, & quidem alii ex Apostolis: Iudas autem, & Capharnaitæ non credebant, de quibus ipse ait; *Sed sunt quidam ex vobis, qui non credunt.* Hos imitantur Lutherani, & multi Calvinistæ.

Secundo dicimus (quod ad rem præsentem pertinet) illa verba, *Nisi manducaveritis carnem filij hominis, & biberitis eius sanguinem, non habebitis vitam in vobis;* continere quidem præceptum de sumenda Eucharistia: non tamen

V.

de vtraq; specie. Duo enim spectari possunt. 1. substantia sumptionis. 2. modus sumptionis. Substantia in eo consistit, vt quis manducet carnem Christi & bibat eius sanguinem. Modus autem in eo, vt quis hoc faciat sub vna, vel sub vtraq; specie. Igitur substantia sumptionis est in præcepto: non modus. Vult enim Christus, vt manducemus carnē & bibamus sanguinem ipsius: non tamen vult, vt id faciamus sub vtraq; specie. Hoc euidenter ostendo, quia nec in verbis citatis, nec in toto capite fit vlla mentio vini aut calicis: Ergo neq; ex illis verbis, neq; ex toto capite conuinci potest præceptum de vtraq; specie. Imo, nec probabiliter inde colligi potest. Vnde enim? An ex voce *carnis & sanguinis*? At iam sæpè dixi, carnem & sanguinem Christi non minus sub vna specie, quàm sub vtraq; contineri. Si ergo possum habere carnem & sanguinem sub vna specie: quæ est necessitas vtriusq;? An ex voce *manducandi*

& bibendi? Ne hoc quidem. Nam supra etiam ostendi, *manducationem & bibitionem* sæpè pro eodem sumi. Et Paulus, 1. Corinth, 3. 2. ait; *Lac vobis potum dedit*: postea cap. 9. 7. dicit; *Quis pascit gregem, & de lacte gregis non maducat?* Si ergo iuxta Paulum, idem est lac bibere & manducare; cur non idem sit, Christum bibere & manducare? Non desunt alia exempla. An non Regius propheta dixit, Psalm. 68. 22. *Dederunt in escam meam fel?* quod tamen alio vocabulo, sed eodem sensu interpretatus est Euangelista, Matth. 27. 34. *Dederunt ei vinum bibere cum felle mixtum.* Ecce, fel bibitur & manducatur: & hoc capiunt aduersarii. Cur non capiunt, cum dicimus, Christum sub vna specie bibi & manducari?

Puto satisfactum esse Hussitis. Nam si in toto illo capite, quod illi nobis obiiciunt, nulla sit mentio vtriusque speciei: nec ex vlllo apice colligi potest eius necessitas: quid habent, quo vrgere nos possunt?

VI.

possunt? Nihil video. Sed tamen ego habeo, quo illos vrgere possum: Et quidem ex eodem capite. Nam Christus cum dixisset; *Nisi manducaueritis carnem filij hominis, & biberitis eius sanguinem*: postea subiecit; *Non sicut manducauerunt Patres vestri manna, & mortui sunt*: qui manducat hunc panem, *viuet in æternum*. Hic quæro, quid Christus intelligat per panem? vel enim intelligit solam speciem panis: vel intelligit seipsum, id est, carnem & sanguinem suum. Si solam speciem panis: necessario sequitur cōtra Hussitas, solam speciem panis sufficere ad salutem. Nam hic erit sensus verborum Christi; *Qui manducat hunc panem, id est, Eucharistiā sub sola specie panis, viuet in æternum*. Si autem intelligit seipsum, id est, carnem & sanguinem suum: iterum sequitur cōtra Hussitas, nō solum carnem, sed etiam sanguinem Christi māducari. Erit ergo hic sensus verborum; *Qui manducat hunc panem, id est, qui manducat carnem & sanguinem meum,*

viuet

viuet in æternum. Idem ergo est manducare & bibere, quod nos contendimus.

Haftenus probaui ex nostris principiis contra Hussitas, non posse colligi præceptum vtriusq. speciei ex verbis supra citatis. Possum idem probare ex principiis Lutheranorum & Calvinistarum, qui putant citata verba, non de sacramentali manducatione & bibitione, quæ fit per speciem panis & vini: sed de spiritali, quæ fit per fidem, intelligi oportere. Hoc autem sic facio. Vel Lutherani & Calvinistæ putant vi illorum verborum, *Nisi manducaueritis carnem filij hominis, & biberitis eius sanguinem*; necesse esse, vt sigillatim vno actu fidei manducetur caro Christi, & alio actu fidei bibatur sanguis Christi: Vel certè putant sufficere, vt vnico actu simul manducetur & bibatur Christus, & consequenter idẽ sit, fide manducare, & fide bibere. Illud prius non dicent: quia putant satisfieri præcepto, si totum Christum

VII.

pro nobis mortuum & crucifixum, vno actu fidei simul apprehendamus. Si ita est, cur non similiter dicamus satisfieri præcepto, si totus Christus sub vna specie manducetur & bibatur? Aut quid necesse est, sigillatim manducare carnem sub specie panis: & sigillatim bibere sanguinem sub specie vini? Sat multa de prima obiectione, quæ est Hussitarum.

VIII. Secunda obiectione, sumitur ex illo Luca 22. 19. *Hoc facite in meam commemorationem.* Hic iubet Christus, ut Apostoli faciant, quod ipse fecit. Ipse autem distribuit omnibus præsentibus vtranque speciem: Ergo & Apostoli, & eorum successores debent vtranque speciem distribuere. Respondeo. Valde miror aduersarios, quod hunc locum nobis obiiciant: idque duplici de causa. Primo, quia de sensu illius, inter se ipsi dissentiant. Lutherani volunt ad omnes fideles: Calvinistæ ad solos Ecclesiæ ministros pertinere. Hanc litteram inter se primò cõponant. Secundo quia

quia nihil inde contra nos euincunt. Hoc ostendo. Nam illa verba, *Hoc facite in meam commemorationem*, non habentur, nisi apud Lucam & Paulum. Cæteri Euangelistæ ea omiserunt. At tam Lucas, quā Paulus, ponit illa post sumptionem panis, non autem post sumptionem calicis: Ergo ex illis non potest colligi præceptum de sumptione calicis. Frustra ergo fatigant se aduersarii. Dicent forte, tametsi post sumptionem panis sint posita, tamen repeti oportere post sumptionem calicis. At vnde hoc constat? Sanè Lucas non repetiuit. Paulus repetiuit quidē, sed cum hac moderatione; *Hoc facite, quotiescunq̃ bibetis, in meam commemorationem*. At cū hac moderatione non continent præceptum de sumptione calicis, sed tantum de commemoratione mortis & passionis Christi: idq̃ non absolutè, sed sub conditione. Non enim absolutè præcipitur illis verbis, vt bibamus calicē: sed sub cōditione præcipitur, si velimus bibere calicē, vt facia-

specie; ante vel post cœnam: dominico aut alio die: lotis vel non lotis pedibus: & his similia. De quibus loquitur Apostolus 1. Corinth. 11. 34. cum ait; *Cætera, cū venero, disponam.* Vide Augustinum epistola 118. ad Ianuariū, ubi pulchrè de hac re disputat.

CAPVT X.

Soluuntur obiectiones ex scripturis.

I.

Explicauī hactenus sententiam Catholicorū, qui docent nullum extare præceptum diuinum de vtrāque specie: ac proinde vnam speciem licitè vsurpari posse, & semper in Ecclesia vsurpatam esse: idque non minori fructu, quàm si ambæ species vsurpètur. Nunc aduersariorum argumenta dissoluenda sunt, quæ ipsi cōtra hanc doctrinam adferunt. Sunt autem triplicia: quædam ex scripturis: alia ex Patribus: alia denique ex ratione desum-

sumpta. Singula ordine discutiemus.

Et quidem omnes aduersarii, vt supra monui, quærunt in scripturis præceptum de vtraque specie; nec tamen inueniunt. Hussitæ quærunt in illis verbis, *Nisi manducaueritis carnem filij hominis, & biberitis sanguinem eius*, Lutherani in illis, *Hoc facite*. Caluinistæ in illis, *Bibite ex eo omnes*. Alii ex illis, *Ego enim accepi à Domino, quod & tradidi vobis*. Sunt ergo quatuor obiectiones petitæ ex scripturis, quas iam persequar.

Prima sumitur ex illo Ioann. 6. 53. *Nisi manducaueritis carnem filij hominis, & biberitis sanguinem eius, non habebitis vitam in vobis*. Hic volunt Hussitæ contineri præceptum Christi de vtraque specie. Nos negamus. Et quod mirum est, nobiscum negant Lutherani & plerique Caluinistæ: non tamen ex eodem principio. Illi, quia putant ibi non agi de sacramentali manducatione: Nos, quia tametsi fateamur agi de sacramentali māducatione, negam⁹ ta-

fieri mentionem vtriusq; speciei. Igitur duo nos asserimus. Vnum, Christum loqui de sacramento Eucharistiæ. Alterum, non tamen, præcipere vtranq; speciem. In priori suffragantur nobis Hussitæ; in posteriori, Lutherani & multi Calvinistæ. Vtrumq; explicandum est.

IIII.

Primo ergo dicimus, Christum in illo cap. 6. apud Ioannem, loqui de triplici cibo. 1. de materiali. 2. de spiritali. 3. de sacramentali. Sicut enim in aliis reb. solet suos auditores ad ipso-
sum captum instruere, paulatim à nobis ad incognita, à sensibilibus ad occulta, à corporalib. ad spiritualia progrediendo; sic etiam hic facit. Et quidè in principio capitis agit de panibus à se multiplicatis, quibus turbæ corporaliter fuerant pastæ & satiatæ. Et quia propter hoc miraculū, ipsum sequebantur, inde sumpta occasione hortatur eos, vt potius quærant cibum spiritualem, quam corporalem. *Operamini,* inquit, *non cibum, qui perit, sed qui perma-*

net in vitam æternam. Hinc ulterius progreditur ad cibum sacramentalē, cum ait; *Panis quem ego dabo, caro mea est, pro mundi vita.* Et iterum; *Nisi manducaueritis carnem filij hominis & biberitis sanguinem eius, non habebitis vitam in vobis.* Ac deinceps; *Caro mea verè est cibus, & sanguis meus verè est potus.* Et deniq; *Non sicut manducauerunt Patres vestri manna, & mortui sunt. Qui manducat hunc panem, viuet in æternū.* Hæc & similia dixit Christus de sacramentali manducatione suæ carnis, & bibitione sui sanguinis. Et credebat illi Petrus, & quidem alii ex Apostolis: Iudas autem, & Capharnaitæ non credebant, de quibus ipse ait; *Sed sunt quidam ex vobis, qui non credunt.* Hos imitantur Lutherani, & multi Calvinistæ.

Secundo dicimus (quod ad rem præsentem pertinet) illa verba, *Nisi manducaueritis carnem filij hominis, & biberitis eius sanguinem, non habebitis vitam in vobis;* continere quidem præceptum de sumenda Eucharistia: non tamen

V.

de vtraqꝫ specie. Duo enim spectari possunt. 1. substantia sumptionis. 2. modus sumptionis. Substantia in eo consistit, vt quis manducet carnem Christi & bibat eius sanguinem. Modus autem in eo, vt quis hoc faciat sub vna, vel sub vtraqꝫ specie. Igitur substantia sumptionis est in præcepto: non modus. Vult enim Christus, vt manducemus carnē & bibamus sanguinem ipsius: non tamen vult, vt id faciamus sub vtraqꝫ specie. Hoc euidenter ostendo, quia nec in verbis citatis, nec in toto capite fit vlla mentio vini aut calicis: Ergo neqꝫ ex illis verbis, neqꝫ ex toto capite conuinci potest præceptum de vtraqꝫ specie. Imo, nec probabiliter inde colligi potest. Vnde enim? An ex voce *carnis & sanguinis*? At iam sæpè dixi, carnem & sanguinem Christi non minus sub vna specie, quàm sub vtraqꝫ contineri. Si ergo possum habere carnem & sanguinem sub vna specie: quæ est necessitas vtriusqꝫ? An ex voce *manducandi*

& bibendi? Ne hoc quidem. Nam supra etiam ostendi, *manducationem & bibitionem* sæpè pro eodem sumi. Et Paulus, 1. Corinth. 3. 2. ait; *Lac vobis potum dedi*: postea cap. 9. 7. dicit; *Quis pascit gregem, & de lacte gregis non maducat?* Si ergo iuxta Paulum, idem est lac bibere & manducare; cur non idem sit, Christum bibere & manducare? Non desunt alia exempla. An non Regius propheta dixit, Psalm. 68. 22. *Dederunt in escam meam fel?* quod tamen alio vocabulo, sed eodem sensu interpretatus est Euangelista, Math. 27. 34. *Dederunt ei vinum bibere cum felle mixtum.* Ecce, fel bibitur & manducatur: & hoc capiunt aduersarii. Cur non capiunt, cum dicimus, Christum sub vna specie bibi & manducari?

Puto satisfactum esse Hussitis. Nam si in toto illo capite, quod illi nobis obiiciunt, nulla fit mentio vtriusque speciei: nec ex vlllo apice colligi potest eius necessitas: quid habent, quo vrgere nos pos-

possunt? Nihil video. Sed tamen ego habeo, quo illos vrgere possum: Et quidem ex eodem capite. Nam Christus cum dixisset; *Nisi manducaueritis carnem filij hominis, & biberitis eius sanguinem*: postea subiecit; *Non sicut manducauerunt Patres vestri manna, & mortui sunt: qui manducat hunc panem, viuet in aeternum*. Hic quæro, quid Christus intelligat per panem? vel enim intelligit solam speciem panis: vel intelligit seipsum, id est, carnem & sanguinem suum. Si solam speciem panis: necessario sequitur cōtra Hussitas, solam speciem panis sufficere ad salutem. Nam hic erit sensus verborum Christi; *Qui manducat hunc panem, id est, Euchariistiā sub solā specie panis, viuet in aeternum*. Si autem intelligit seipsum, id est, carnem & sanguinem suum: iterum sequitur contra Hussitas, nō solum carnem, sed etiam sanguinem Christi māducari. Erit ergo hic sensus verborum; *Qui manducat hunc panem, id est, qui manducat carnem & sanguinem meum,*

viuet

viuet in æternum. Idem ergo est manducare & bibere, quod nos contendimus.

VII.

Haftenus probaui ex nostris principiis contra Hussitas, non posse colligi præceptum vtriusq. speciei ex verbis supra citatis. Possum idem probare ex principiis Lutheranorum & Calvinistarum, qui putant citata verba, non de sacramentali manducatione & bibitione, quæ fit, per speciem panis & vini; sed de spirituali, quæ fit per fidem, intelligi oportere. Hoc autem sic facio. Vel Lutherani & Calvinistæ putant vi illorum verborum, *Nisi manducaueritis carnem filij hominis, & biberitis eius sanguinem*; necesse esse, vt sigillatim vno actu fidei manducetur caro Christi, & alio actu fidei bibatur sanguis Christi; Vel certè putant sufficere, vt vnico actu simul manducetur & bibatur Christus, & consequenter idẽ sit, fide manducare, &, fide bibere. Illud prius non dicent: quia putant satisfieri præcepto, si totum Christum

quia nihil inde contra nos euincunt.
Hoc ostendo. Nam illa verba, *Hoc facite in meam commemorationem*, non habentur, nisi apud Lucam & Paulum. Cæteri Euangelistæ ea omiserunt. At tam Lucas, quā Paulus, ponit illa post sumptionem panis, non autem post sumptionem calicis: Ergo ex illis non potest colligi præceptum de sumptione calicis. Frustra ergo fatigant se aduersarii. Dicent forte, tametsi post sumptionem panis sint posita, tamen repeti oportere post sumptionem calicis. At vnde hoc constat? Sanè Lucas non repetiuit. Paulus repetiuit quidē, sed cum hac moderatione; *Hoc facite, quotiescunq; bibetis, in meam commemorationem*. At cū hac moderatione non continent præceptum de sumptione calicis, sed tantum de commemoratione mortis & passionis Christi: idq; non absolutè, sed sub conditione. Non enim absolutè præcipitur illis verbis, vt bibamus calicē: sed sub cōditione præcipitur, si velimus bibere calicē, vt facia-

ciamus hoc in memoriam Christi. Simile est, quod dixit Christus in Euangelio; *Si vis perfectus esse, vade, & vende omnia, quæ habes, & da pauperibus.* Hic non præcipit absolutè, vt vëdamus omnia nostra, & demus pauperibus: sed sub conditione, vt id faciamus, si velimus sequi perfectionem Euangelicam. Eodem modo cum dicit; *Tu autem cum oraueris, intra in cubiculum tuum;* nō præcipit absolutè orationem, sed si volumus orare, vt siue inani gloria id præstemus. Eiusmodi exempla sunt infinita in scriptura. Et sanè res tam perspicua est, vt non egeat maiori declaratione. Solum condoleo simplicioribus, qui tam miserè ab aduersariis illuduntur.

IX. Tertia obiectio sumitur ex illo Matth. 26. 27. *Bibite ex hoc omnes.* Vrger hæc verba Calvinus l. 4. inst. cap. 17. §. 47. cum ait; *Edictum æterni Dei est, vt omnes bibant.* Et §. 48. *Præcipientis verba sunt, Bibite ex hoc calice omnes.* Respondeo, Calvinus spectat verba, non sensum

sum: ideoq; simplici lectori fucū facit. Non enim voluit Christus, vt absolute omnes biberent ex eo calice; sed vt omnes Apostoli, qui presentes erant. Hoc patet ex ipso contextu. Cum enim diuisisset panem Eucharisticū in varias partes, & singulis Apostolis singulas porrexisset; calix autem eo modo diuidi non posset; vni ex Apostolis integrum porrexit, cum hac cautione, vt non putaret totum sibi ebibendum esse, sed aliquid inde degustandum, ac deinde reliquis ordine porrigendum. Itaq; verba illa, *Bibite ex hoc omnes.* perinde valent, atq; illa, Lucae 22. 7. *Accipite, & diuidite inter vos*, id est, vnus nō exhauriat totum calicem, sed singuli aliquid bibant. Quod & factum est, vt testatur Marcus cap. 14. 24. cum ait; *Et biberunt ex eo omnes.* Vtiq; illi omnes ex eo biberunt, quibus dictum erat à Christo; *Bibite ex hoc omnes.* Quid quaeso hic difficultatis est? non plus, quàm si paterfamilias, arrepto calice recentis musti, modicè enim degustaret, & postea

postea filiis degustandum porrigeret cum hac formula; *Bibite ex hoc omnes*, id est, singuli modicum aliquid inde capiant: nemo solus totum exhauriat. An propterea, quotquot extra familiam illam essent, putarent se cogi præcepto, ut ex eodem calice mustū gustarent? Ridiculum sanè.

X. Sed instant aduersarii hoc modo: Iisdem dictum est, *Bibite*, quibus quibus dictum est, *Manducate*, At hoc dictum est omnibus: Ergo & illud. Respondeo. Vel stupidi, vel importuni sunt, qui sic agunt. Iam ostendi, solis Apostolis præsentibus, dictum esse, *Bibite*. Iisdem dictum est, *Manducate*. Et quid opus est noua probatione? Persistam in exemplo paulo ante allato. Si paterfamilias, tempore cœnæ, diceret famulis & ancillis præsentibus, *Manducate & bibite*; an ideo censeretur omnes extraneos præcepto cogere ad manducandum & bibendum? Non opinor. Eodem modo fecit Christus. Dixit Apostolis in vltima cœna præsentibus,

Man-

Manducate & bibite. An illis verbis præceptū dedit generale, quo oēs Christianos obligaret? Nihil minus. Vbi ergo, inquires, præceptū dedit, si ibi non dedit? Respōsio in promptu est. Si quæritur præceptum de vtraq. specie: nusquam dedit. Si de Eucharistia, abstra- hendo ab vna vel vtraq. specie: dedit illis verbis, Ioan. 6. 53. *Nisi manducaueritis carnem filij hominis, & biberitis eius sanguinem, non habebitis vitam in vobis.* Vbi iterum notanda est insignis aduersariorum impudentia. Nam in his ipsis verbis, *Nisi manducaueritis, &c.* vbi reuera præceptum est: præceptum non agnoscunt. In illis autem, *Bibite ex hoc omnes*, vbi præceptum non est, præceptum esse contendunt. Quid agas cum hoc hominum genere? Nimirum, contradictionis spiritum habent.

Iterum instant: Ipsemet Christus XI.
 alibi fatetur, se omnibus dicere, quid-
 quid dicit Apostolis, iuxta illud Mar-
 ci 13. 37. *Quod vobis dico, omnibus dico.*
 Atqui

Atqui Apostolus dixit. *Bibite* : Ergo omnibus hoc dixit. Omnes ergo tenentur vsurpare calicem. Respondeo. Et hic apertè fucum faciunt aduersarii, truncando verba Christi. Ipse enim sic dixit ; *Quod vobis dico, omnibus dico, vigilate.* Hanc particulam, *vigilate*, omittūt illi boni viri, ex qua tamen sensus totius sententiæ pendet. Non enim est hic sensus ; *Omnia simpliciter, quæ vobis dico, omnibus dico.* Nam multa dixit Apostolis, quæ omnib. non dixit : vt Matt. 26. *Omnes vos scandalum patiemini in me, in ista nocte.* Et Ioann. 6. 70. *Nonne ego vos duodecim elegi, & ex vobis vnus diabolus est ?* Sensus ergo hic est ; *Quod dico vobis, vt vigiletis, hoc omnibus dictum volo.* Oēs enim debent vigilare, ne mors imparatos inueniat. Omnes debent inuitari virgines prudentes, iuxta illud Matth. 25. 13. *Vigilate itaque, quia nescitis diem neq̃ horam.*

XII.

Quarta obiectio sumitur ex illo 1. Corinth. 11. 23. *Ego enim accepi à Domino, quod & tradidi vobis, &c.* Vbi Apostolus

lus ostendit vtranq. speciem, non solū
 ex Christi institutione, sed etiā ex Apo-
 stolica traditione, præceptā esse. Hoc
 enim significat illa particula, *Tradidi
 vobis*. Vnde fit tale argumentum; Om-
 nīs traditio Apostolica est seruanda:
 sed est traditio Apostolica de vtraque
 specie: Ergo seruanda est. Respondeo.
 Aduersarii omnia confundunt. Sanē
 hæc tria, *institutio, traditio, præceptum*, o-
 mninō distincta sunt. Fateor vtranq.
 speciem à Christo institutam esse: fa-
 teor vtranq. ab Apostolo traditā: Ne-
 go, vtranq. iure diuino præceptā esse.
 Et quidem, quod institutio differat à
 præcepto; multis exemplis probatū
 est cap. 1. Quod autē traditio & præ-
 ceptum non sunt idem, ex eo patet,
 quia Apostoli multa tradiderunt pri-
 mis Christianis, quæ tamen præcepta
 nobis non sunt. Et ne longè abeam, ex
 eodem loco Pauli probari id potest.
 Sic enim habet in fine citati capitis;
*Itaq. fratres mei, cum cōuenitis ad manducā-
 dum, inuicem expectate. Si quis esurit, do-*

mi manducet. An putant aduersarii cōtineri hic præceptum, quod oēs obliget? Sat scio, nō tam scrupulosos esse.

XIII.

*Vide Pleſſ
ſaum l. 1.
de Eucha-
riſtia cap.
10. pag.
127. linea
46.*

Præter hæc ſcripturæ loca, quæ hæcenus allata ſunt, audent etiam pro vtraque ſpecie, quod dixit Chriſtus Matth. 19. 6. *Quod Deus coniunxit, homo non ſeparet.* Atqui Deus, inquit, coniunxit vtranq; ſpeciem: Ergo Pontifex non poteſt vnā ab altera ſeparare. Reſpondeo. Ex iis, quæ hæcenus allata ſunt ab aduerſariis, ſatis cōſtat, nihil eos ſolidi adferre poſſe. Verum ex hoc loco, planè apparet aut inſanos, aut inſigniter petulantes eſſe. Quæ enim connexio eſt; *Homo non poteſt ſeparare virum ab vxore: Ergo non poteſt communicare ſub vna ſpecie?* Si ſic pergant, ſine dubio perſuadebunt, nullum reum, quantumvis ſceleratum, nullam feram, pecudem, piſcem aut auē necari ab homine poſſe. Quare? quia quod Deus coniunxit, homo non ſeparet: ſed Deus coniunxit animam cum corpore, tam in hominib, quàm

quàm in cæteris animantibus: Ergo nemo potest animam separare à corpore, ac proinde nullum viuens interficere. Sed relinquamus has ineptias, quæ planè indigne sunt homine Christiano. Miror autè, aduersarios huiusmodi præfidiis se tueri.

CAPVT XI.

Soluantur obiectiones ex Patribus.

Sicut aduersarii frustra in scripturis quæsiuerunt præceptum Christi de vtraq; specie: sic frustra quærent in Patribus. Nec tamen minorem conatum hic adhibent, quàm ibi. Nam, vt cæteros omittam, Plessæus Calvinista lib. i. de Eucharistia cap. 10. discurrens per singulas penè ætates, à temporibus Apostolorum ad nos usque, quotquòt potest, corradit Patrum testimonia, pro vtraque specie confir-

manda. Sed vel nihil, vel parū ad rem; quod illi homini familiare est. Semper enim extra statum & scopū quæstionis vagatur. Quæstio inter nos & aduersarios, non consistit in eo, an utraq; species fuerit olim in usu; sed potius, an fuerit in præcepto? Patres, qui à Plessæo citantur, significant fuisse in usu, quod libenter concedimus (sicut etiam vna species fuit in usu, vt supra ostendi) non tamen dicunt fuisse in præcepto, de quo disputamus. Sunt tamen pauci, qui videntur hoc insinuare, de quibus breuiter & sigillatim dicendum est.

- II. Omissis ergo Patribus, qui tantum de usu loquuntur: inter cæteros, qui videntur loqui de præcepto, primo loco obuii potest Cyprianus, qui in sermone de coena Domini, sic habet; *Nona est huius sacramenti doctrina, & schola Evangelica hoc primum magisterium protulerunt, & Doctore Christo primum hæc mundo innotuit disciplina, vt biberent sanguinem Christiani, cuius esum legis antiquæ*
autho-

authoritas strictissime interdicat. Lex quippe esum sanguinis prohibet: Euāgelium præcipit, ut bibatur. Respondeo. Hoc testimonium Cypriani planè destruit doctrinam Calvinistarū, & nostram confirmat. Vnde miror à Plessæo adductū esse. Hoc ostendo dupliciter. Primo, quia astruit veritatem corporis & sanguinis Christi in Eucharistia: quam Calvinistæ negant. Nam Cyprianus dicit, Christianos bibere sanguinem Christi. Calvinistæ dicunt, non bibere eos sanguinem, sed figuram sanguinis Christi, nempè vinum sacramentale. Quod autem Cyprianus loquatur de vero sanguine, & nō de figura sanguinis, patet ex antithesi, quam facit. Ait enim Iudæis in veteri lege fuisse prohibitum, ne biberēt sanguinem: Christianis autem in Euangelio præceptū esse, ut bibant sanguinem. Hoc sanè non potest intelligi de figura sanguinis, sed de vero sanguine. Nam si agatur de figura sanguinis, fatentur Calvinistæ, non minus Iudeos bibisse san-
i 3 guinem

guinem Christi in figura Agni paschalis, & aquæ salientis è petra: quâ Christiani bibant sanguinem Christi in figura vini, Huc enim spectat, quod Plessæus ait l. 4. de Eucharistia cap. i. pag. 653. in fine; *Dicemus idem de paschate & cœna dominica. In utroq; corpus & sanguis Domini comeduntur & bibuntur. Necesse ergo est, Cyprianû loqui de vero sanguine: ac proinde ex sententia Cypriani, verum sanguinem Christi præsentem esse in Eucharistia: quod Calvinistæ negant. Hæc confirmatur ex eodem Cypriano, qui ibidem sic habet; Panis iste, quem Dominus discipulis porrigebat, non effigie, sed natura mutatus, omnipotentia verbi, factus est caro. Quid clarius contra Calvinistas? Potuisset addere; Vinum istud, quod Dominus discipulis porrigebat, non effigie, sed natura mutatum, omnipotentia verbi, factum est sanguis. Longè aliter Calvinistæ. Panis & vinum, inquiunt, nec effigie, nec natura, mutata sunt, sed tantum significatione: nec facta sunt caro & sanguis, sed figuræ*

figuræ carnis & sanguinis.

Iam verò, cum Cyprianus ait; *Lex III.*
esum sanguinis prohibet; Euangelium præ-
cipit, vt bibatur: iterum contra aduer-
 sarios facit, non contra nos. Nam præ-
 ceptum, de quo loquitur, non fundat
 in illis verbis, *Bibite ex hoc omnes;* in quo
 aduersarii illud fundant; sed in illis,
Nisi manducaueritis carnem filij hominis,
& biberitis eius sanguinem, non habebitis
vitam in vobis. At hæc verba, vt supra
 ostendi, continent quidē præceptū de
 manducatione carnis, & bibitione
 sanguinis Christi: non tamen de vtra-
 que specie. Et hoc ipsum sentit Cy-
 prianus. Cum enim citasset illa ver-
 ba; *Nisi manducaueritis carnem filij ho-*
minis, & biberitis eius sanguinem: paulo
 post subiecit; *Potus & esus ad eandem*
pertinent rationem. q. d. idem est man-
 ducare Christum, & bibere Chri-
 stum. Qui ergo manducat Chri-
 stum sub vna specie, non solum
 manducat carnem, sed etiam bi-
 bit

bit sanguinem ipsius: ac proinde præcepto Euāgelico, de quo loquitur Cyprianus, perfectè satisfacit.

IIII. Secundo obiicitur Ghrysofomus hom. 18. in posteriorem Corinthiam, ubi ait; *Est autem, ubi nihil differe sacerdos à subdito, ut quando fruendum est horrēdis mysteriis. Similiter enim omnes, ut illa percipiamus, digni habemur. Non sicut in veteri lege, partem quidem sacerdos comedebat, partem autem populus: & non licebat populo participem esse eorum, quorum participes erat sacerdos. Sed nunc non sic: verum omnibus vnum corpus proponitur, & poculum vnum.* Respondeo. Nulla hic fit mentio diuini præcepti de vtrāq; specie. Nec Chrysofomo propositum fuit, eo loco, de tali præcepto disputare. Hoc solum egit, ut assignaret differentiam inter veterem & nouam legē, quoad sacrificia vtriusq; legis. Nam in veteri lege, nec sacerdos, nec populus gaudebat toto sacrificio: sed vnam illius partem sacerdos, alteram populus comedebat. In noua lege non ita

res habet. Totum sacrificium, quantū quidem ad victimam, quæ offertur, attinget, æquè à populo, æquè à sacerdote participatur. Vtrique, tam populo, quàm sacerdoti, totus Christus, secundum carnem & sanguinem, manducandus & bibendus proponitur. Quis hoc neget? Nec aliud vult Chrysostomus.

Vt tamen res melius intelligatur, notandum est, in lege Mosaica fuisse triplex sacrificium, nempe holocaustum, hostiam pro peccato, & hostiā pacificam. Holocaustum erat omnium perfectissimum, quia totum cremabatur in honorem Dei, & nihil ex eo comedebatur. Hostia pro peccato partim cremabatur, partim cedebat in usum sacerdotum, qui in atrio templi ex eo vescebantur. Hostia pacifica diuidebatur in tres partes, quarū prima cremabatur: altera cedebat sacerdotibus: tertia populo offerenti. Et quidem sacerdotibus cedebat pectusculum & armus dexter, de quo non

V.

licebat populo manducare. Hoc igitur est, quod dicit Chrysostomus; *Partem sacerdos comedebat, partem autem populus: & non licebat populo participem esse eorum, quorum particeps erat sacerdos.* Non sic in noua lege. Christus, qui est victima, totus populo, totus sacerdoti porrigitur.

VI.

Quod autem addit Chrysostomus; *Omni- bus vnum corpus proponitur, & poculum vñ:* nõ debet intelligi de speciebus sacramentalibus, sed de ipso Christo, qui offertur. Non enim sensus est, omnibus Christianis, tam Laicis, quàm sacerdotibus, proponi eandem speciem panis, & eandem speciem vini: quia hoc falsum est, cum singuli accipiant singulas partes panis & vini cõsecrati, inter se realiter & numero distinctas: sed, omnibus proponi eandem Christi carnem, & eundem sanguinem: ita vt sacerdos nihil carnis aut sanguinis percipiat, quod non etiam percipiant Laici. Et in hac re po-
nit

nit discrimen inter noui ac veteris testamenti sacerdotes & populum.

Tertio obiicitur Leo Papa serm. 4. *VII.*
 de quadragesima, vbi de Manichæis ita scribit; *Ore indigno Christi corpus accipiunt: sanguinem autem redemptionis nostræ haurire omninò declinant. Quod ideo vestram volumus scire sanctitatem, vt vobis huiusmodi homines, & his manifestentur indi- ciis, & quorum deprehensa fuerit sacrilega simulatio, notati & proditi, à sanctorum societate, sacerdotali authoritate pellantur.* Respondeo. Aduersarii duòbus modis hic peccant in citando Leone. Primo, quia Leo his verbis confirmat veritatem corporis & sanguinis Christi in Eucharistia, quam ipsi negant, Secundo, quia non condemnat communionem sub vna specie in Catholicis, qui eam legitimè tunc vsurpabant: sed in Manichæis, qui ex sacrilega superstitione abstinebant à calice, vt supra capite quinto ostensum est.

Con-

VIII.

Consulatur historia illius temporis, quæ sic habet. Excisa per Gensericum Africa, Manichæi, qui inde eiectioni erant, sub specie pietatis & Catholicæ religionis, in Italiam irrepserunt: & plerique Romam ingressi, volentes suam hæresim occultare, inter Catholicos habitabant, & cum iis publicè subvna specie communicabant: ut hac ratione pro Catholicis haberi & tolerari possent. Igitur Leo, cum primum factus est Pontifex, statim adiecit animum ad eos penitus extirpandos. Usus est autem variis mediis. Nam primum pro concione instruxit ciues Romanos, quàm nefanda essent Manichæorum dogmata & sacrilegia. Secundò, dedit eis manifestum signum, quo à Catholicis discerni possent: asserens illos, qui semper abstinerent à calice, pro Manichæis: qui aliquando, pro Catholicis habendos esse. Tertiò, hortatus est populum, ut si alicubi scirent occultari Manichæos, statim eos detegerent, & Ecclesiastico magistratui

tui manifestarent. Quarto, conuocauit Concilium Episcoporum, in quo, præsentē Clero Romano, & multis Senatoribus, Manichæorum sacrilegia publicè detecta & examinata sunt. Quinto, scripsit ad vicinos Italiæ Episcopos, vt & ipsi serio laborarent in extirpandis Manichæis, si qui fortè apud illos occultè latitarēt. Hæc omnia patent ex ipso Leone, præsertim serm. 4. de collectis, serm. 4. de quadragesima, serm. 7. de Natali Domini, serm. 4. de Epiphania, serm. 5. de ieiunio decimi mensis, & epist. 93. cap. 16.

Hinc Prosper in chronico, commendat illum his verbis; *Hoc tempore plurimos Manichæos intra urbem latere, diligentia Papæ Leonis innotuit: qui eos de secretis suis erutos, & oculis totius Ecclesiæ publicatos, omnes dogmatis sui turpitudinem & damnare fecit & prodere, incensis eorum codicibus, quorum magna moles fuerunt interceptæ. Quæ cura viro sancto diuinitus, vt apparet, inspirata, non solum Romanæ urbi, sed etiam vniuerso orbi plurimum profuit:*
siqui-

siquidem confessionibus in vrbe captorum, qui doctores eorum, qui Episcopi, quinè presbyteri, in quibus prouinciis vel ciuitatibus degerent, patefactum est. Multiq; orientalium parium sacerdotes, industriam Rectoris imitati sunt. Vide plura apud Baronium tomo 6. annalium Ecclesiasticorum, circa annū Christi 443. & sequentes.

X.

Quarto obiicitur Gelasius Papa, qui apud Gratianum cap. comperimus, de consecrat. dist. 2. sic habet; *Comperimus, quod quidam sumpta tantummodo corporis sacri portione, à calice sacri cruoris abstineant. Qui procul dubio, quomā nescio qua superstitione docentur obstringi, aut sacramenta integra percipiant, aut ab integris arceantur: quia diuisio vnius et eiusdem mysterij, sine grandi sacrilegio non potest prouenire. Respondeo. Hæc obiectio est similis præcedenti. Et iam supra cap. 5. notauī, Gelasium reprehendere eos tantum, qui ex superstitione abstinebant à calice, cuiusmodi erant occulti Manichæi. Cætera vide loco citato,*

CA.

CAPVT XII.

Soluuntur obiectiones ex ratione.

ADuersarii, vt in re desperata fieri solet, vndecunq; possunt, quærūt subsidia pro vtraq; specie, vt oppugnent Catholicos. Sed, vt sæpè dixi, frustra. Certè obiectiones, quas desumūt ex ratione, eiusmodi sunt, vt & nostrā causam vehementer confirmet, & illorum reddant deteriorem. Sunt autem hæc.

Prima sumitur ex figura veteris testamenti, hoc modo; Omnes Hebræi in deserto biberunt aquam de petra, iuxta illud 1. Corinth. 10. 4. *Omnes eundem potum spiritualem biberunt.* Ergo etiā omnes Christiani in deserto huius vitæ debent bibere sanguinem Christi. Sequela patet ex illo 1. Corinthior. 10. 6. *Hæc autem in figura facta sunt nostri.* Respondeo. Hoc ipso

ipſo argumento conuincam aduerſarios. Nam ſi aqua de petra fuit figura Euchariftiæ: ſine dubio, fuit aqua ſacramentalis. Vel ergo ſumebatur cum cibo ſacramentali, vel ſola. Si ſola: fauet vni ſpeciei, non duabus. Si cum cibo ſacramentali: quis ille fuit? Nuſquam legimus in tota Scriptura, Hebræos, cum biberent aquam de petra, ſumpſiſſe ſimul ex præcepto diuino cibum aliquem ſacramentalem.

III.

Addo, ſi generatim loquamur de figuris Euchariftiæ, plus nobis eas patrocinari, quam aduerſariis. Hoc ſic oſtendo. Catholici agnoſcunt has figuras. 1. panem & vinum Melchife-dech. 2. panes propoſitionis. 3. panem ſubcineritium Eliæ. 4. Manna. 5. aquam de petra. 6. Agnū paſchalem. 7. ſacrificia Moſaica. Omnes hæc, excepta prima, repræſentant Euchariftiam ſub vna ſpecie. Aduerſarii autē non agnoſcunt primam figuram. Ergo, ſecundum aduerſarios, nulla eſt figura, quæ repræſentet vtranq; ſpecie.

Nam

Nam panes propositionis, panis sub-
cineritius, & manna, repræsentant spe-
ciem panis. Aqua de petra, repræsen-
tat speciem vini. Agnus paschalis & sa-
crificia Mosaica sumebantur à Laicis
per modum cibi tantum. Quid ergo
reliquum est Lutheranis, & Calvinistis
pro vtraq; specie? Nihil, nisi panis &
vinum Melchisedech. At hunc ipsum
panem & vinum volunt fuisse pro-
phanum, non sacramentalem.

Cum autem inferunt aduersarii, *IIII.*
sicut Hebræi biberunt aquam de pe-
tra, sic Christianos debere bibere san-
guinem Christi: libenter id concedi-
mus. At inde non conuincitur neces-
sitas vtriusq; speciei. Nam vt sæpè di-
ctum est, Christiani non solum man-
ducant carnem Christi, sed etiam bi-
bunt sanguinem ipsius, quotiescunq;
communicant sub vna specie: quia
totus Christus secundum carnem &
sanguinem, non minus sub vna, quàm
sub vtraq; specie continetur.

Secunda obiectio sumitur ex insti-

tutione & exemplo Christi, ad hunc modum: Christus in vltima cœna instituit & distribuit Eucharistiam sub vtrâq; specie, panis & vini: Ergo nos eodem modo debemus distribuere. Respondeo. Quid si regeram & dicâ: Christus in Emaus distribuit Eucharistiam sub vna specie: Ergo nobis eodem modo licet distribuere. Vel sic: Christus in vltima cœna instituit & distribuit Eucharistiam post alios cibos, & lotis prius pedibus: Ergo aduersarii debent idem facere. Cur ergo vesperi non communicant? & cur pedes ante communionem non lauant? cur non parent præcepto Christi dicentis, Ioan. 13. 14. *Et vos debetis alter alterius pedes lauare?* Sed, non est necesse ad hanc solutionem confugere. Iam supra dixi, aliud esse institutionem: aliud præceptum. Christus instituit Eucharistiam sub vtrâq; specie: non tamen præcepit vtrâq; speciem. Sicut instituit officium prædicandi, baptizandi, ordinandi, peccata remittendi ac retin-

nen-

nendi: & tamen Laici apud aduersarios non ideo putant, se diuino præcepto ad ista obligari. Vide supra capite primo.

Tertia sumitur ex ratione testamēti. Christus in vltima cœna, cum videret se breui moriturum, condidit solenne testamentū, quo omnibus Christianis, tanquam filiis adoptiuis, legauit carnem & sanguinem suum, titulo hæreditatis, vt patet Lucæ 22. 20. Ergo Catholici, qui negant Laicis sanguinē, & iubent sola carne contentos esse, sunt violatores testamenti, & priuant Christianos altera parte hæreditatis sibi debitæ. Respondeo, Catholici hoc non faciunt, sed Lutherani & Caluinistæ. Nam Catholici totum Christum, secundum carnem, sanguinem, animā rationalem & diuinitatem, exhibent Laicis sub vna specie. Caluinistæ nihil istorum, sed tantum externa signa carnis & sanguinis: perinde, atque illi, qui codicillos porrigunt hæredibus, & vniuersam substantiā dissipant. Lu-

VI.

therani; qui negant totum Christum sub vna specie contineri: quid aliud, suo iudicio, quàm mortuam carnem sub specie panis, & mortuum sanguinem sub specie vini, exhibere possunt communicantibus?

VII. Quarta sumitur ex fine huius sacramenti. Finis illius est, commemoratio mortis Christi, ad quam tenentur oēs fideles, iuxta illud 1. Cor. II. 24. *Hoc facite in meam commemorationem.* Et paulo post; *Quotiescunq; enim manducabitis panem hunc, & calicem bibeitis, mortem Domini annunciabitis, donec veniat.* At mors Christi non potest integrè significari & repræsentari per vnā speciem: Ergo sicut tenemur ad commemorandam Christi mortem: ita etiam ad vtrāq; speciem percipiendam. Respōdeo. Hic syllogismus habet duo vitia, 1. quia constat quatuor terminis. Nam in maiori propositione ponitur *commemoratio mortis Christi*; in minori, *repræsentatio*. Hæc autem valdè inter se differunt. 2. quia ex Apostolo contra Apo-

Apostolum concludit, Nam ex Apostolo sumit, omnes fideles in sumptione sacramenti Eucharistiæ debere memores esse mortis Christi, quod verum est. At contra Apostolum concludit, ad commemorationem mortis Christi, necessariam esse vtranq. speciem. Nam vna sufficit, secundum Apostolum. Hoc patet ex ipso textu. Cum enim de vna specie dixisset; *Accipite & manducate: Hoc est corpus meum, quod pro vobis tradetur: immediate subiunxit; Hoc facite in meam commemorationem.* Et rursus, cum de altera dixisset; *Hic calix nouum testamentum est in meo sanguine:* iterum immediate subiunxit; *Hoc facite, quotiescunq. bibetis, in meam commemorationem.* Ergo secundum Apostolum, vnaquæq. species per se sumpta, sufficit ad cōmemorationem mortis Christi. Vnde si ex vitioso aduersariorum syllogismo, fiat probus ac legitimus: planè contra ipsos concludemus, hoc modo; Omnes fideles, in sumptione Eucharistiæ, tenentur ad commemo-

rationem mortis Christi: sed commemoratio mortis Christi, potest fieri per vnam speciem, vt ex Apostolo ostensum est: Ergo per vnam speciem satisfit obligationi. Quid apertius?

VIII. Sed, ne tergiuerentur aduersarii, exemplo domestico rem explicabo. Quidam vir nobilis ab hoste captus, & in vincula coniectus est, cum amissione bonorum omnium. Imperator liberat illum à vinculis; & vt tanti beneficii memor sit, nouo beneficio illum afficit. Nimirum, ex mensa Imperatoria, perpetuam annonam illi constituit in pane & vino: vt quotiescunq; manducandum aut bibendum est, prioris beneficii memoria illi occurrat. Hic quæro ab aduersariis, an Nobilis ille non possit recordari beneficii Imperatoris, si sumat panem sine vino, aut etiam, si sumat vinum sine pane? Potest utique. Siue enim vtatur solo pane, siue solo vino; semper illi in mentem venit, Imperatoris bene-

beneficio se viuere & sustentari. Simile est in nostro proposito. Erasmus capti ab hoste humani generis & in carcerem cōpacti. Christus sua morte & passione liberauit ac redemit nos. Vt tanti beneficii memores essemus, nouo beneficio cumulare nos voluit. Non panem & vinum, sed carnem & sanguinem suum, sub specie panis & vini, in perpetuam alimoniam nobis reliquit. Siue ergo manducemus carnem & bibamus sanguinem illius sub specie panis tantum: siue sub specie vini tantum: siue sub vtraque: parum interest. Semper enim occurrat cogitatio, alieno beneficio nos viuere, manducare, bibere.

Porro, quod supra adieci, commemorationem mortis Christi, differre ab eius repræsentatione, tametsi notum sit, breuiter etiam explicandum est. Et persistam in exemplo allato. Nobilis ille, qui ab Imperatore liberatus à carcere est, variis

IX.

modis excitari potest ad recordationē
 beneficii in se collati. Primo, si, vt iam
 dictum est, annona illi constituta sit in
 hunc finem, vt quoties manducat aut
 bibit, benefactoris sui recordetur. Se-
 cundo, si memoriæ causa, in libello,
 qui quotidie in manibus sit, Impera-
 toris liberalitatem descriptam habeat.
 Tertio, si effigiem, quæ imperatorem
 repræsentet, ex collo gestet, aut domi
 affixam conseruet. Omitto alios mo-
 dos. Nam hi tres ad rem explicandam
 sufficiunt. Igitur in tribus illis modis,
 ubiq; cernitur commemoratio bene-
 ficii: in solo tertio, repræsentatio. Et
 rursum, in tertio modo, commemo-
 ratio oritur ex repræsentatione. Nam
 hoc ipso, quod is, qui beneficio affe-
 ctus est, intuetur imaginem sui bene-
 factoris, quæ illum repræsentat, non
 potest non illius meminisse, si animo
 præsens est. Facile hæc ad propositum
 applicantur. Variis modis possumus
 recordari beneficii, quo Christus re-
 demptor sua morte nos affecit. Primo

ex perceptione sacramēti Eucharistiæ, quod in eum finem à Christo institutum est, Secundo, ex lectione Euangelii, in quo mors & passio eius describitur, Tertio, ex aspectu imaginis Christi, quæ ipsum, aut passionem eius repræsentet. Vides, opinor, quo pacto representatio diuersa sit à commemoratione.

Atque ex his, quæ clara & aperta sunt, infero, Catholicos in cōmemoranda Christi morte, multo diligentiores esse, quàm aduersarios, præsertim Calvinistas. Nam Catholici, non solum ex perceptione sacramenti Eucharistiæ, vel lectione Euangelii, sed etiam ex aspectu imaginis Crucifixi, recordantur beneficii à Christo in se collati. At Calvinistæ iam pridē Christi imaginem è suis templis, addo etiā ex animis, proscripserunt & exturbaverunt. Sed de hoc alibi. Prosequamur reliquas aduersariorum obiectiones.

X.

Quinta obiectio sumitur à simili. Scilicet auferre Laicis vnā partē Eu-

XI.

charistiæ: licebit etiam auferre vnam partem Baptismi. At hoc non licet: Ergo nec illud. Respondeo. Partes sacramentorum sunt duplices: aliæ substantiales seu essentielles: aliæ solum integrantes. Priores non licet auferre ab vilo sacramento. Nec Catholici hoc faciunt. Posteriores licet auferre. Nam in Baptismo, ex tribus immersionib. possunt duæ tolli: Vna enim sufficit. Et in Eucharistia, ex duabus speciebus potest auferri altera. Hoc Christus fecit in Emaus: Christiani tempore Apostolorum: & alii deinceps, vt supra ostensum est. Nos idem facimus. Porro, aduersarii in hoc genere audaciores sunt. Tollunt ipsi, non solum integrantes, sed etiam essentielles partes Eucharistiæ. Et quidē Calvinistæ tollunt carnem & sanguinem Christi: & sola symbola externa relinquunt Laicis. Lutherani, à specie panis tollunt sanguinem, animam rationalem, Diuinitatem: & solam carnem ex sanguinem & ex animam sibi reseruant.

Plus

Plus dico: Aduersarii nō solum partes sacramētorum, sed integra tollunt sacramenta. Ex septem, quæ Ecclesia Catholica cum Augustino agnoscit: vix duo vel tria illis supersunt, Sed nolo hic hærere.

Sexta sumitur ab incommodo. Si potest Laicis negari vna species, poterit negari & altera: & sic nihil habebunt. Respondeo, Hoc non sequitur: vt patet in simili. Non enim rectè colligis: Si in baptismo potest tolli vnamersio, poterit etiam altera & tertia tolli. Deinde, præceptum Christi est, vt sumamus Eucharistiam, quocunq; modo id fiat. Non autem præceptum est, vt sumamus sub vtraq; specie. Potest ergo vna species negari: non tamen potest Eucharistia negari. Sicut in simili, potest omitti vna aut altera mersio: non tamen potest baptismus omitti. Aut, si vis exemplum magis accommodatum: Non potest integrè omitti omnis cibus & potus corporalis, quia vita sustentanda est: potest

XII.

potest tamen è duabus scutellis omitti vna, si in altera sufficiens nutrimentū est. Cum igitur sub specie panis sit totus Christus, totum nutrimentū, tota alimonia; quid tantopere necesse est, alteram adhibere? Et hoc pro Catholicis dixero. Quid porro, p se dicēt Calvinistæ, qui quidem duas scutellas, sed omnino vacuas, sine omni cibo & potu obtrudunt esurientibus & sitiētibz? id est, qui externa tantum symbola panis & vini exhibent: & omnē Christi carnem ac sanguinem, quo nostras animas nutrirī oportebat, è medio tollunt? Hæc hæctenus.

CAPVT XIII.

Omnino igitur in Catholicorum sententia persistendum est.

- I. EXiis, quæ hæctenus dicta sunt, duæ rationes deduci possunt, cur in Catholicorum sententia persistendū sit. Prior est, quia Catholici, qui defendūt vsum vnius speciei, habent pro se exemplum


plum Christi, Apostolorum, & totius antiquitatis usq; ad nostra tempora. Habent pro se duo solidissima fundamenta, quib. tueri se possunt. Vnum, quia Christus non minus sub vna, quã sub vtraq; specie, totus & integer continetur. Alterum, quia non minor fructus ex vna, quã ex altera percipi potest. Aduersarii vero, qui urgēt necessitatem vtriusq; speciei, nullum possunt in scripturis inuenire præceptum de vtraq; specie: in illo quærendo, penit^r inter se dissident: nullo Patrū testimonio subnixi sunt: nullo solido argumento suam sententiam stabilire possunt. Imo, vt hætenus visum est, suis ipsorum argumentis confixi ac refutati sunt.

Posterior est: quia Catholici in asserenda communione sub vna specie, nihil vnquam dixerunt, quod offensionem aut scandalo esse possit. Aduersarii verò, præsertim Lutherani & Calvinistæ, posteaquam vsum vnius speciei oppugnare ceperunt, in manifestos

II.

istos errores prolapsi sunt. Lutherani, asserendo corpus Christi sub specie panis contineri mortuum & sine sanguine: Calvinistæ, negādo, vllam Christi partem sub specie sacramentali præsentem esse. Prudens Lector apud se æstimet, quos in hac re sequi tutius sit.

FINIS *Thesium.*



D. Augustinus in psal, 56.

Qualem vesaniam patiantur hæretici, quaeso ut attendatis. Illi præcisi à compagine Ecclesiæ Christi, & partem tenentes, & totam amittentes nolunt communicare orbi terrarum, quo diffusa est gloria Christi. Nos autem Catholici in omni terra sumus, quia omni terra communicamus, quacunque gloria Christi diffusa est.

Et lib. 1. de vera religione
cap. 7.

Tenenda est nobis Christiana religio, & eius Ecclesiæ communicatio, quæ Catholica est